

ILIDŽA



**INFORMATIVNI BILTEN
OPĆINE ILIDŽA**
BROJ 196



Budžet 2022.

Najveći Budžet Općine Ilidža ikada usvojen u redovnoj proceduri, i to u iznosu od 38.120.000 KM. Više od 50% ovog Budžeta namijenjeno je kapitalnim investicijama.

Vizija Ilidže

Ova godina trebala bi biti historijska za Ilidžu i njene stanovnike. Naša vizija i važni kapitalni projekti u potpunosti bi trebali promijeniti izgled naše lokalne zajednice.

Za primjer

Savjetnik za borbu protiv korupcije i upravljanje kvalitetom KS, Erik Larson, kazao je da Općina Ilidža može biti primjer drugim općinama u Kantonu Sarajevo.

SADRŽAJ

Obnovljen dio ulice Hrasnička cesta

Projekt ukupne vrijednosti 1,5 miliona KM

Delegacija Općine Ilidža u posjeti Srebrenici

Podrška MC će biti stalna stavka u budžetu Općine

Podrška za 90 programa i projekata

Blizu 430.000 KM za oblast kulture, sporta i obrazovanja

634 besplatne članarine u Biblioteci Sarajevo

Pogodnosti za ljubitelje knjige na teritoriji Ilidže

Općini Ilidža lider u lokalnoj politici za mlade

Priznanje dodijelila inicijativa "Fakat je vakat za mlade"

Za BiH se borila od Ilidže do Bihaća

29. godišnjica formiranja IV viteške motorizovane brigade

Prvo radno iskustvo za 43 mladih osoba

Na stručnom osposobljavanju u Općini Ilidža

Poplava kakva se ne pamti na Ilidži

Adekvatna reakcija spriječila katastrofu

Marko Jašar novi pravobranilac Općine Ilidža

Osma redovna sjednica Općinskog vijeća Ilidža

Općina Ilidža započela obnovu premjera

Prva u Federaciji Bosne i Hercegovine nakon 30 godina

Prva ledena ploha na Ilidži

Zimska čarolija u Velikoj aleji

Načelnik Muzur i ministar Šteta obišli ratni put

Cilj povezivanje Ilidže sa Hadžićima i Trnovom

Gradi se moderna sportska dvorana u Hrasnici

Potpisan sporazum vrijedan 1,75 KM

5

7

8

8

9

11

16

17

18

21

22

22

29

**Murizu Memiću Zlatna plaketa****Predstavljeni kapitalni projekti
Općine Ilidža za period 2022. - 2024.****Larson: Općina Ilidža primjer i
model za sve općine u KS****Jednoglasno usvojen najveći Budžet
Općine Ilidža, prihvaćeni svi amandmani**

IMPRESSUM

Izdavač: **Općina Ilidža**

Butmirska cesta 12

71210 Ilidža

info.desk@opcinailidza.ba

+38733775600

www.opcinailidza.ba

Pripremili:

Mubina Ljubović-Isaković**Azra Sinanbašić****Mahir Kustura****Dino Stambolić**

Štampa:

Grafičar promet d.o.o.Tiraž: **5.000**DTP: **Dino Stambolić**



RIJEČ NAČELNIKA

Protekla godina bila je izuzetno teška za sve nas. Uz pandemiju koronavirusa, koja još traje, u novembru 2021. godine područje općine Ilidža pogodila je poplava kakva se ne pamti na ovim prostorima. Bio je to ultimativni test za sve nas, a pogotovo za nadležne općinske službe, koje su pokazale da imaju snage i znanja da u kriznim situacijama reaguju na pravi način.

Poplava i rekordan vodostaj rijeke Željeznice, ali i drugih vodotoka na Ilidži, pokazali su još jednom probleme koji sežu godinama unazad, a kojima smo dosta pažnje posvetili u protekloj kalendarskoj godini. Ko zna kakav bi se tek scenarij dogodio da prošlog ljeta nisu čišćena korita skoro svih vodotoka na općini Ilidža.

Nismo bježali od odgovornosti, niti smo se ustezali tokom poplava, već smo proglasili stanje prirodne nepogode kako bi mogli povući sredstva iz civilne zaštite i da bi mogli obešteti građane čija imovina je nastradala u novembarskim poplavama. Donijeli smo odluku da prvo obeštimo fizička lica, a onda, ukoliko ostane novca, i privredna lica.

Poduzeti su i određeni koraci, zahvaljujući kojima će se u budućnosti smanjiti rizik od poplava.

Osigurali smo 800 hiljada konvertibilnih maraka od Kantona Sarajevo kako bi izvršili eksproprijaciju zemljišta u Otesu, u prvih 300 metara na dijelu korita rijeke Željeznice koji se tokom poplava pokazao kao najproblematičniji, a iskreno se nadam da će ove godine Agencija za vodno područje rijeke Save konačno krenuti sa uređenjem najugroženijeg dijela korita rijeke Željeznice.

Iako je u 2021. bilo privremeno finansiranje, do kraja godine smo uspjeli realizovati nešto više od 65% Budžeta Općine Ilidža. Uprkos svim izazovima, izuzetno je važno naglasiti da je prihodovna strana Budžeta za 2021. godinu realizovana više od 100%.

Pred kraj godine jednoglasno je usvojen i Budžet Općine Ilidža za 2022. godinu, i to najveći ikada u redovnoj proceduri, u iznosu od 38.120.000 KM.

U Budžetu za 2022. zadržane su sve stavke namijenjene za socijalnu zaštitu, podršku boračkoj populaciji, podršku iz oblasti sporta, kulture, obrazovanja, mladih i druge, dok su povećana izdvajanja koja se odnose na kapitalne projekte, čime je više od 50% Budžeta namijenjeno kapitalnim investicijama, što ovaj Budžet čini razvojnim.

U 2021. uspjeli smo realizovati 44 kapitalna projekta iz oblasti saobraćaja. Asfaltirali smo 10.742 metra saobraćajnica ukupne vrijednosti 6,27 miliona KM, a svakako vrijedi izdvojiti potpunu rekonstrukciju dijela Hrasničke ceste.

U javnu rasvjetu u prošloj godini uloženo je oko 394.000 KM,

a u vodovodnu i kanizacionu mrežu oko 727.000 KM.

Općina Ilidža je u 2021. godini dodijelila 693 stipendije, finansirala je besplatne udžbenike za prvačiće i 635 besplatnih članarina u biblioteci. Podržali smo i 90 projekata iz oblasti kulture, sporta i obrazovanja, kao i 60 sportista, 45 lica na stručnom osposobljavanju i deset studenata dobitnika priznananja "Srebrna značka".

Općina je dala podršku organizaciju 25 kulturnih i sportskih manifestacija, 12 muzičkih programa u Rustempašinoj ulici te se pobrinula da Ilidžanci po prvi put ikada dobiju ledenu plohu.

Nastojali smo biti odgovorni kada je riječ i o socijalnim pitanjima. Porodicama romske populacije osigurali smo novi alternativni smještaj, sufinansirali smo 38 medicinskih potpomognutih oplodnji, podržali 16 projekata humanitarnih organizacija, isplatili 546 jednokratnih pomoći za rođenje djeteta i 1.118 jednokratnih pomoći.

Brinuli smo i o boračkoj populaciji, no prvi put su sredstva boračkim udruženjima dodijeljena putem javnog poziva, a finansirano je njih 19 i realizovano 36 projekata.

Iz oblasti privrede 54 projekta dobila su poticaj za poljoprivredu, a dodijeljeno je i 29 plastenika. Iznađena su sredstva za podršku za 17 najboljih poslovnih planova, kao i za sufinansiranje zapošljavanja i samozapošljavanja žena (ukupno 49 osoba). Raspoloživo općinsko zemljište dodijeljeno je za sjetvu, a osigurane su i olakšice za privrednike zbog pandemije koronavirusa.

Uprkos svemu urađenom u 2021. godini, vjerujem da će 2022. biti historijska godina za općinu Ilidža. Priče koje su drugi pričali decenijama mi ćemo početi sprovoditi u djelo, a jedna od tih priča svakako je tramvajska pruga Ilidža - Hrasnicu, baš kao i izgradnja osnovne škole na Stupu.

Kao projekt od posebnog značaja za stanovnike Ilidže je početak obnove premjera, koji je počeo aviosnimanjem katastarske općine Vlakovo krajem 2021. godine.

U 2022. godini nastojat ćemo da kroz realizaciju važnih projekata Ilidžu učinimo što ugodnijim mjestom za život, da zadržimo sve one dobre stvari po kojima je naša lokalna zajednica u prošlosti bila prepoznatljiva te da ih oplemenimo s onim što joj je u proteklom periodu nedostajalo.

Svjestan sam da će i ova godina biti puna izazova. Ipak, kroz reakcije i angažman građanki i građana Ilidže tokom poplava shvatio sam da posjedujemo kapacitete kojima kao općina možemo biti primjer drugima, baš kao što je to rekao i Erik Larson, savjetnik u Uredu za borbu protiv korupcije i upravljanja kvalitetom KS, kada je govorio o radu Općine Ilidža.

Vaš načelnik,



Granatom sa srpskih položaja ubijen 71 Tuzlak

26. GODIŠNJICA STRADANJA NA KAPIJI U TUZLI

Načelnik Općine Ilidža, Nermin Muzur, posjetio je Memorijalni kompleks Slana banja i Kapiju u Tuzli, gdje je obilježena 26. godišnjica stravičnog zločina na Kapiji. Tog, tužnog, 25. maja 1995. godine od eksplozije granate ispaljene sa srpskih položaja na planini Ozren, na okupljalištu Kapija, u centru Tuzle, ubijena je 71 osoba.

Polaganjem cvijeća i učenjem Fatihe počast poginulim odali su članovi njihovih porodica, brojni Tuzlaci kao i politički predstavnici Grada, Tuzlanskog kantona, FBiH te drugih općina i gradova.

Među ubijenim bio je veliki broj mladih, a tada je ranjeno više od 200 civila. Ovaj masakr upamćen je kao jedan od najvećih zločina protiv civilnog stanovništva, počinjenih tokom agresije na Bosnu i Hercegovinu.



Fatiha i počast za nastradale

Rukovodstvo Općine Ilidža obilježilo 5. maj



Načelnik Muzur položio cvijeće na spomen-obilježje

Povodom obilježavanja Dana sjećanja na ubijenu djecu Sarajeva - 5. maj, načelnik Općine Ilidža, Nermin Muzur, i zamjenici predsjedavajućeg Općinskog vijeća Ilidža, Redžo Lemezan i Samir Avdić, položili su cvijeće na Spomen-obilježje ubijenoj djeci opkoljenog Sarajeva 1992. - 1995.

Vlada Kantona Sarajevo 5. septembra 2019. donijela je odluku da će se 5. maj obilježavati kao Dan sjećanja na ubijenu djecu Sarajeva.

- Ovo je jedan od najtužnijih dana u godini i naša obaveza je da odamo počast ubijenoj djeci Sarajeva i da ih nikad ne zaboravimo - istakao je načelnik Muzur.

Cvijeće su položili i članovi Udruženja roditelja ubijene djece opkoljenog Sarajeva, delegacije Predsjedništva BiH, FBiH, Grada Sarajeva, općina sa područja Kantona Sarajevo i druge.

Stali u odbranu Bosne i Hercegovine

ILIDŽA OBILJEŽILA DAN ZLATNIH LJILJANA



Sjećanje na najhrabrije bosanske sinove i kćeri

Rukovodstvo Općine Ilidža, predvođeno načelnikom Nerminom Muzurom, u maju je obilježilo nekoliko važnih datuma, među njima su i Dan Zlatnih ljiljana, kao i Dan pobjede nad fašizmom

Polaganjem cvijeća i učenjem Fatihe 10. maja 2021. na Centralnom spomen-obilježju šehidima i poginulim borcima, kao i na šehidskom mezarju Kovači - Hrasnica, odata je počast svima koji su tokom agresije dali život za odbranu i opstanak Bosne i Hercegovine. Na tom "putu" najveće priznanje Zlatni ljiljan dobilo je 64 ilidžanaca, od čega njih 30 posthumno.

Drugim ratnim priznanjima nagrađeno je 25 naših sugrađana.

Zločinci 23. maja 1992. godine granatom ubili dva dječaka

GODIŠNJICA STRADANJA BRAĆE MERAJIĆ

Delegacija Općine Ilidža položila je cvijeće u ulici Kasima Begića, povodom godišnjice stradanja, Adisa Merajića (1981. - 1992.) i Halila Merajića (1977. - 1992.).

Sjećanje na događaj kada su zločinci 23. maja 1992. godine

granatom ubili dva brata, održano je u organizaciji Udruženja roditelja ubijene djece opkoljenog Sarajeva 1992. - 1995. Događaju su prisustvovali članovi porodica ubijenih, članovi udruženja kao i građani.

Projekt ukupne vrijednosti 1,5 miliona KM realizovan u tri faze

OBNOVLJEN VAŽAN DIO HRASNIČKE CESTE



Načelnik Muzur i ministar Šteta

Obnovom dijela ulice Hrasnička cesta u dužini od 940 metara kompletiran je projekt koji je realizovan u tri faze, a čija je ukupna vrijednost iznosila 1,5 miliona KM, dok su kompletnom dužinom saobraćajnice obnovljene pješačke staze.

- Projekt je realizovan u tri faze, a izgrađeno je 1,7 kilometara Hrasničke ceste, od spoja sa Butmirskom cestom do spoja sa M-17. Projekt je trebao biti završen 2022. godine, ali je na veliko zadovoljstvo građana realizovan u 2021. godini - rekao je Adnan Šteta, ministar saobraćaja Kantona Sarajevo, po okončanju radova početkom jula 2021. godine.

Cijelom dužinom saobraćajnice obnovljena je i pješačka staza.

- Zadovoljni smo što su radovi na ovoj saobraćajnici završeni i nastavljamo sa uređenjem ovog lokaliteta, kako bi stvorili što ljepši i povoljniji ambijent za naše građane. Zahvaljujemo se ministru Šteti na saradnji i podršci projektima na području općine Ilidža. Nastavljamo saradnju i realizaciju projekata i u narednom periodu - kazao je načelnik Općine Ilidža, Nermin Muzur.

Da će biti nastavljeno uređenje ovog lokaliteta potvrđeno je zasađivanjem 60 novih sadnica jasena, koje su zamijenile dotrajala stabla, a zasađeno je i 790 sadnica niskog rastinja.

Zajednički projekt Općine Ilidža i Direkcije za puteve Kantona Sarajevo

OTVOREN NOVI KRUŽNI TOK NA ILIDŽI

Radovi na kružnom toku na raskrsnici ulica M-17 - Ibrahima Ljubovića - Bosanskih gazija uspješno su završeni krajem maja 2021. godine.

Izgradnja kružnog toka realizirana je kao zajednički projekt Općine Ilidža i Direkcije za puteve Kantona Sarajevo. Realizacija ovog projekta jedan je od glavnih preduslova za zatvaranje centra Ilidže za saobraćaj, odnosno za pretvaranje Rustempašine ulice u pješačku zonu.

- Zahvaljujemo se Ministarstvu saobraćaja KS i Direkciji za puteve KS na podršci i odličnoj saradnji. Naredna faza je četvrti krak prema naselju Pejton. Uz konsultovanje struke iznalazimo najbolje rješenje i idemo u pripremu svih potrebnih dokumenata i detalja - rekao je načelnik Općine Ilidža, Nermin Muzur.



Postavljene su i barijere za zaštitu od buke prema Pejtonu

Testna zatvaranja ulice Rustempašina vršena su redovno u periodu od petka (17 sati) do ponedjeljka (5 sati)

CENTAR ILIDŽE POSTAJE PJEŠAČKA ZONA

Izgradnjom kružnog toka na saobraćajnici M-17 te ulica Ibrahima Ljubovića i Bosanskih gazija stvoreni su uslovi za preusmjeravanje saobraćaja sa centralnog dijela Ilidže.

Općina Ilidža u protekloj godini vršila je testno djelomično zatvaranje glavne ilidžanske saobraćajnice - Rustempašine ulice za motorna vozila, a kako bi se utvrdilo na koji način će to utjecati na učesnike u saobraćaju.

Prema riječima Nermina Muzura, načelnika Općine Ilidža, već godinama je planirano zatvaranje glavne ilidžanske ulice za motorna vozila, kako bi centar Ilidže postao pješačka zona.

- U pripremi je idejno rješenje pretvaranja centralnog dijela Ilidže i Rustempašine ulice u pješačku zonu, što podrazumijeva kompletno arhitektonsko i urbanističko rješenje. Cilj nam je da ova saobraćajnica bude pješačka zona, veliki trg sa dodatnim sadržajima za naše građanke i građane - poručio je načelnik Općine Ilidža, Nermin Muzur.



Planirano je zatvaranje glavne ilidžanske ulice

FOTO: Klix.ba

Testna zatvaranja ulice Rustempašina vršena su redovno u periodu od petka (17 sati) do ponedjeljka (5 sati), sve dok nisu počeli radovi na rekonstrukciji tramvajske pruge, kada su zbog smanjenja gužve obustavljena.

Drugi dan Ramazanskog bajrama



Proučen i poklonjen Jasin svim šehidima

OBILJEŽEN DAN ŠEHIDA

Dan šehida, tradicionalno je obilježen drugog dana Ramazanskog bajrama, a ovom prilikom građani širom Bosne i Hercegovine, pa tako i Ilidžanci, prisjetili su se onih koji su položili živote u agresiji na našu zemlju.

Načelnik Općine Ilidža Nermin Muzur i rukovodstvo Općinskog vijeća Ilidža, Dan šehida obilježili su učenjem Fatihe i polaganjem cvijeća na Centralnom spomen-obilježju Ilidža, kao i na mezarju Kovači u Hrasnici, gdje je proučen i poklonjen Jasin svim šehidima.

Delegacija Općine Ilidža položila je cvijeće i proučila Fatihu kod Ljetne pozornice, gdje je u organizaciji JOB-a Unije veterana, Općine Ilidža i Fonda memorijala Kantona Sarajevo, održan tradicionalni Memorijalno-historijski susret "Odbrana Ilidže 2". U sklopu održane manifestacije održan je historijski sat i izvršen obilazak Ratne spomen sobe Četvrte viteške motorizovane brigade i 102. motorizovane brigade ARBiH.



Počast šehidima odali su i predstavnici političkih partija

Na mjestu bitke cvijeće su položile i proučili Fatihu u znak poštovanja i sjećanja na poginule, delegacije JOB-a, Koordinacije boračkih udruženja, članovi porodica šehida i poginulih branitelja, te predstavnici političkih stranaka SDA, NiP i Naša stranka. Načelnik Muzur uručio je diplome najboljim malim lovcima: Vedadu Bašaliću, Amsalu Bašoviću, Mehi Botulji, Dini Đeliloviću, Farisu Bilaloviću i Almiru Kahviću.



Rukovodstvo Općine Ilidža

Općina Ilidža osigurala hedije za 85 porodica



BAJRAMSKI PRIJEM ZA PORODICE ŠEHIDA I POGINULIH BORACA

Načelnik Općine Ilidža, Nermin Muzur, upriličio je bajramski prijem za porodice šehida i poginulih boraca. Zbog epidemiološke situacije, prijem je organiziran za 30 porodica, a uručena im je simbolična bajramska hedija od po 100 KM. U saradnji sa Organizacijom porodica šehida i poginulih boraca, organizovana je i dodjela bajramske hedije za ukupno 85 porodica, kojima ista ranije nije dodjeljivana.

- Ovakvi prijemi bude posebne osjećaje, jer svi znamo kako je nositi bol i tugu zbog gubitka najmilijih. Želim da znate da je Općina Ilidža uvijek tu i da su naša vrata uvijek otvorena za vas i u skladu s našim mogućnostima i nadležnostima pomoć je neupitna - izjavio je, između ostalog, načelnik Muzur.

Članovi porodica šehida i poginulih boraca zahvalili su načelniku Nerminu Muzuru i Općini Ilidža.

Sjećanje na 15. maj 1992. godine

ODBRANJEN STOJČEVAC

U organizaciji Udruženja 2. motorizovani bataljon i Četvrte viteške motorizovane brigade obilježena je 29. godišnjica odbrane Stojčevca, koji je imao veliku ulogu u agresiji na Bosnu i Hercegovinu. Lokalitet Stojčevca bio je od posebnog značaja jer je u neposrednoj blizini Ratnog puta preko planine Igman, koji je bio žila kucavica za Sarajevo.

Učenjem Fatihe i polaganjem cvijeća, na spomen-obilježju Stojčevac, delegacija Općine Ilidža predvođena načelnikom Nerminom Muzurom odala je počast svim šehidima i poginulim borcima.

Počast najhrabrijim bosanskim sinovima odale su i brojne delegacije boračkih udruženja, političkih stranaka kao i porodice poginulih. Prvi komandant ovog bataljona, Rifat Hodžić, evocirao je uspomene na 15. maj 1992. godine, kada su borci stali u odbranu Stojčevca nakon povlačenja UN-a.

U emotivnom obraćanju, načelnik Muzur je istakao kako se uvijek treba sjećati i nikad ne zaboraviti one koji su se borili i koji su ubijeni, samo jer su željeli da odbrane svoje porodice i državu.

Ovaj značajan datum ujedno je i godišnjica formiranja 2. motorizovanog bataljona Četvrte viteške motorizovane brigade i Dan mjesne zajednice Hrasnica II.

Učenjem Fatihe i polaganjem cvijeća odata je počast i šehidima i poginulim borcima na spomen-obilježju ispred Doma kulture u Hrasnici.

Delegacija Općine Ilidža u posjeti Srebrenici i Bratuncu



Učenjem Fatihe i polaganjem cvijeća odata počast žrtvama genocida u Srebrenici

MUZUR: PODRŠKA MEMORIJALNOM CENTRU ĆE BITI STALNA STAVKA U BUDŽETU OPĆINE

Direktor Memorijalnog centra Srebrenica - Potočari, Emir Suljagić, zahvalio se rukovodstvu Općine Ilidža na podršci, te je predstavio aktuelne kao i planirane projekte, a s načelnikom Nerminom Muzurom razgovarao je o mogućnostima saradnje i realizaciji zajedničkih projekata

Načelnik Općine Ilidža Nermin Muzur, u društvu predsjedavajućeg Općinskog vijeća Tarika Stambolića i zamjenika predsjedavajućeg Samira Avdića, u maju 2021. godine posjetio je Memorijalni centar Srebrenica - Potočari.

Povod za posjetu bio je potpisivanje Memoranduma o saradnji između Općine Ilidža i Memorijalnog centra Srebrenica - Potočari.

Učenjem Fatihe i polaganjem cvijeća delegacija Općine Ilidža odala je počast žrtvama genocida u Srebrenici.

Direktor Memorijalnog centra Emir Suljagić zahvalio se rukovodstvu Općine Ilidža na podršci, te je predstavio aktuelne kao i planirane projekte.



Potpisivanje Memoranduma o saradnji

- Potpisom sporazuma o saradnji sa Memorijalnim centrom želimo pokazati da je njegov rad izuzetno bitan za sve nas te da će uvijek imati podršku Općine Ilidža. Od ove godine je podrška Memorijalnom centru prvi put posebna stavka u budžetu i ona će biti stalna stavka i narednih godina - istakao je načelnik Muzur.

Načelnik Muzur i direktor Suljagić razgovarali su o mogućnostima saradnje i realizaciji zajedničkih projekata.

Prije posjete Memorijalnom centru, delegacija Općine Ilidža učenjem Fatihe i polaganjem cvijeća u Šehidskom centru na Veljacima uzela je učešće u vjerskom programu povodom obilježavanja Dana šehida i sjećanja na šehide i nevine žrtve agresije sa područja općine Bratunac. Ovim povodom proučen je Jasin i hatma za šehide.



Muzur, Stambolić i Avdić u društvu Suljagića

Općina Ilidža izdvojila blizu 430.000 KM za oblasti kulture, sporta i obrazovanja

PODRŠKA ZA 90 PROGRAMA I PROJEKATA

Općina Ilidža podržala je 90 programa i projekata iz oblasti sporta, obrazovanja i kulture koji su formalno-pravno zadovoljili uslove Javnog poziva.

Na osnovu definisanih kriterija za dodjelu budžetskih sredstava na Javni poziv mogla su aplicirati udruženja, klubovi i sportska društva, te javne ustanove registrovane u Bosni i Hercegovini, sa sjedištem na području općine Ilidža koji će realizirati projekte u interesu građana ove općine.

Iz oblasti sporta u 2021. godini realizirao se 51 projekt, 14 iz kulture i 25 iz oblasti obrazovanja. Za ove namjene Općina Ilidža je izdvojila blizu 430.000 KM.

- Cilj je da na području općine Ilidža realiziramo što više aktivnosti iz oblasti sporta, kulture i obrazovanja za mladu populaciju i građane. Općina će podržati sve ideje i projekte koji su od interesa za našu lokalnu zajednicu te kroz udruženja koja djeluju na području općine. Želja nam je podržati i ponuditi neformalne aktivnosti u kojima će učestvovati naši učenici, mladi i građani - kazao je načelnik Općine Ilidža, Nermin Muzur.

Pogodnosti za ljubitelje knjige na teritoriji Ilidže



Pozajmno odjeljenje Ilidža

OPĆINA OSIGURALA 635 BESPLATNE ČLANARINE U BIBLIOTECI SARAJEVO

Općina Ilidža svojim građanima i građankama u 2021. godini osigurala je 635 besplatne članarine u Javnoj ustanovi Biblioteka Sarajevo, čije se Pozajmno odjeljenje Ilidža nalazi u Multimedijalnom centru, na adresi Hrasnička cesta 8.

Iako je vrijeme novih tehnologija, digitalizacije i društvenih mreža, Općina Ilidža je kroz besplatne članarine u JU Biblioteke Sarajevo željela animirati što veći broj Ilidžanaca na čitanje.

- Željeli smo animirati građane da u što većem broju posjećuju biblioteku koja se nalazi u Multimedijalnom centru Ilidža. S obzirom na to da želimo unaprijediti kulturu čitanja nakon prvih 200 besplatnih članarina i poslije molbi građana, odlučili smo izdvojiti dodatna sredstva i osigurati novih 350 besplatnih članarina - izjavio je načelnik Općine Ilidža, Nermin Muzur.

U posljednjoj od tri faze Općina Ilidža je omogućila 84 besplatne članarine za osobe od 15 do 30 godina, a koje žive na teritoriji naše lokalne zajednice.



Načelnik Muzur uručio ugovore

Općina Ilidža potpisala ugovore s osnovnim školama

BESPLATNI UDŽBENICI ZA PRVAČIĆE NA ILIDŽI



Prvačići su dobili besplatan komplet knjiga i radnih sveski

Općina Ilidža izdvojila je dodatna sredstva kako bi osigurala besplatne udžbenike za prvačiće.

U Budžetu Općine Ilidža za 2021. godinu osigurana su dodatna sredstva, a umjesto ruksaka, polaznici u prvi razred dobili su besplatan komplet knjiga i radnih sveski.

- Odlučili smo da ćemo umjesto ruksaka, prvačićima osigurati knjige i radne sveske. Raduje me što smo uspjeli osigurati dodatna sredstva za ovu namjenu u odnosu na prethodne godine - izjavio je načelnik Općine Ilidža Nermin Muzur, koji je s direktorima osnovnih škola potpisao ugovore za doznačavanje finansijskih sredstava školama za provođenje postupka nabavke knjiga i radnih sveski za prvačiće.

Nakon prvog upisnog roka za školsku 2021./2022., u prve razrede osnovnih škola na području općine Ilidža upisano je 563 učenika.

Tri krovna tijela mladih u Bosni i Hercegovini organizovala "Youth Nest: Gathered4Youth"

OPĆINI ILIDŽA PRIPALA NAGRADA LIDER U OBLASTI LOKALNIH POLITIKA ZA MLADE



Važno priznanje za Općinu Ilidža

Ovo priznanje Općini Ilidža dodijelila je inicijativa "Fakat je vakat za mlade" tokom događaja "Youth Nest: Gathered4Youth" koji su organizovala tri krovna tijela mladih u Bosni i Hercegovini

Općina Ilidža proglašena je liderom u oblasti lokalnih politika za mlade u Bosni i Hercegovini, a na osnovu Javnog poziva za podnošenje prijedloga za dodjelu javnih priznanja upućenog svim jedinicama lokalne samouprave u našoj zemlji.

Ovo priznanje Općini Ilidža dodijelila je inicijativa "Fakat je vakat za mlade" tokom događaja "Youth Nest: Gathered4Youth" koji su organizovala tri krovna tijela mladih - Vijeće mladih FBiH, u saradnji sa Omladinskim savjetom RS i Vijećem/Savjetom mladih Brčko distrikta Bosne i Hercegovine.

Događaj koji je organizovan 9. septembra 2021. godine u ilidžanskom hotelu Hills, a kojem je prisustvovao i veliki broj međunarodnih institucija, bio je podijeljen u dva segmenta: radni ručak predstavnika krovnihih tijela za mlade i zajednica po mjeri mladih za 2020. godinu i večer sa donatorima.

Radnom ručku događaja prisustvovao je i načelnik Općine Ilidža Nermin Muzur. U svom obraćanju općinski načelnik govorio je o opredjeljenju Općine Ilidža za daljnji razvoj omladinske politike i stvaranju što boljih uslova za mlade ljude.

Poticaaj otvaranju novih radnih mjesta, Općina Ilidža sufinansira troškove registracije poslovnih ideja

PODRŠKA MLADIMA: 70.000 KM ZA 19 BIZNISA

Po Javnom pozivu Općine Ilidža za sufinansiranje najboljih poslovnih planova sredstvima iz budžeta namijenjenih razvoju poduzetničke inicijative i zapošljavanja mladih sa ciljem da se pomogne onima koji po prvi put zasnivaju radni odnos, 19 aplikacija zadovoljilo je uslove i sa njima su potpisani ugovori.

Općinski načelnik Nermin Muzur čestitao je dobitnicima i izrazio nadu da će u narednom periodu unaprijediti svoj rad i širiti svoje poslovanje.

- Ponosan sam što ste se odlučili da u ovom vremenu sami pokrenete vlastiti biznis. Mi ćemo i dalje biti na raspolaganju kao podrška stvarajući što bolji ambijent za vaše poslovanje - kazao je načelnik Muzur, te mladima zaželio puno sreće i uspjeha.

S ciljem pružanja podrške poslovnim idejama mladih, prilike za samozapošljavanje i doprinos razvoju svoje lokalne zajednice, Općina Ilidža izdvojila je 70.000 KM za sufinansiranje troškova



Mladi potpisali ugovore

pokretanja biznisa kroz finansiranje troškova registracije biznisa, troškova sredstava za rad, zakupa poslovnih prostora, obrtnih sredstava i ostalih troškova.

Svečana sjednica Općinskog vijeća Ilidža održana na Ljetnoj pozornici

OPĆINA ILIDŽA URUČILA PRIZNANJA ZA 2021.



Zlatna plaketa Općine Ilidža za 2021. godinu dodijeljena je Murizu Memiću

Dobitnicima i članovima porodica dobitnika priznanja su uručili općinski načelnik Nermin Muzur, predsjedavajući OV Ilidža Tarik Stambolić, te njegovi zamjenici Samir Avdić i Redžo Lemezan

Svečana sjednica Općinskog vijeća Ilidža na kojoj su dodijeljena priznanja Općine Ilidža za 2021. godinu održana je na Ljetnoj pozornici na Ilidži. Sjednica čije je održavanje bilo planirano 12. marta povodom Dana Općine Ilidža zbog epidemiološke situacije odgođena je za 11. august.

Svečanoj sjednici prisustvovali su ministri Vlade Kantona Sarajevo, predsjedavajući Skupštine KS, gradonačelnica Grada Sarajeva, načelnici općina, predsjedavajući općinskih vijeća, zastupnici Skupštine KS, vijećnici Općinskog vijeća Ilidža, uposlenici Općine Ilidža, građani i građanke, kao i mnogi drugi prijatelji naše općine.



Tarik Stambolić, predsjedavajući OV Ilidža

- Okupili smo se da obilježimo 12. mart Dan Općine Ilidža i da uručimo priznanja svim dobitnicima na ovoj Svečanoj sjednici te se na taj način javno zahvalimo svim pojedincima i kolektivima koji su dali doprinos u različitim oblastima. Posebnu zahvalnost odajemo onima kojima su priznanja Općine dodijeljena posthumno - rekao je predsjedavajući OV Ilidža, Tarik Stambolić, nakon što je otvorio Svečanu sjednicu.

Općinski načelnik Nermin Muzur istakao je historijsku važnost obilježavanja 12. marta - Dana Općine Ilidža i zahvalio se svim dobitnicima priznanja na njihovom doprinosu u razvoju lokalne zajednice.

- Ponosni smo što imamo građane i građanke općine Ilidža koji zalaganjem i doprinosom učestvuju u promociji i razvoju naše lokalne zajednice - rekao je Muzur, te dodao:

- Nadam se da ćemo i ubuduće svi raditi na unaprjeđenju općine Ilidža i okupljati se u što većem broju, sa što ljepšim i boljim pričama.

Odlukom o dodjeli priznanja Općine Ilidža za 2021. godinu na Drugoj redovnoj sjednici OV Ilidža Zlatna plaketa Općine Ilidža za 2021. godinu dodijeljena je Murizu Memiću.

Kolektivna Zlatna plaketa pripala je Covid-ambulantni Doma zdravlja Ilidža, dok je Udruženje Veterani policije 91. - 95. Općine Ilidža dobitnik kolektivne Srebrene plakete.

Povelju počasni građanin dobio je Šerif Konjević, dok su Fahrudin Budnjo (posthumno), Josip Katalinski - Škija (posthumno), Damjan Babić - Daša (posthumno), Suad Jukić - Šule i Mladen Tomić dobitnici Povelje za životno djelo.

Plaketa odbrane pripala je Admiru Vreti (posthumno) i Hasetu Tiriću. Zahvalnice su dodijeljene Akifu Stamboliću (posthumno), Nusretu Rovčaninu - Giški (posthumno), Fahrudinu Kahviću, Nedimu Mekiću, Hamedu Kadiću, Kantonalnom centru za socijalni rad i Službi socijalne zaštite Općine Ilidža. Dobitnicima i članovima njihovih porodica, priznanja su uručili načelnik Općine Ilidža Nermin Muzur, predsjedavajući OV Ilidža Tarik Stambolić i njegovi zamjenici Samir Avdić i Redžo Lemezan.

Obilježena 29. godišnjica formiranja Četvrtе viteške motorizovane brigade

ZA BIH SE BORILA OD ILIDŽE DO BIHAĆA



Rukovodstvo Općine Ilidža predvođeno načelnikom Muzurom odalo počast poginulim borcima

Kroz redove brigade tokom agresije na Bosnu i Hercegovinu prošlo više od 10.000 vojnika, njih 425 dalo je život za odbranu domovine, dok ih je 1.132 zbog ranjavanja steklo status ratnog vojnog invalida

Polaganjem cvijeća i učenjem Fatihe na spomen-obilježju Četvrtе viteške motorizovane brigade obilježena je 29. godišnjica brigade Armije Republike Bosne i Hercegovine koja je formirana 28. jula 1992. godine.

Pored rukovodstva Općine Ilidža, koje je predvodio načelnik Nermin Muzur, polaganju cvijeća prisustvovalе su brojne delegacije političkih partija, predstavnici udruženja, prijatelji i članovi porodica šehida i poginulih boraca.

Na Svečanoj sjednici Općinskog vijeća Ilidža, koja je uslijedila nakon polaganja cvijeća, općinski načelnik Nermin Muzur i predsjednik Udruženja Četvrtа viteška Muhamed Nogo podsjetili su sve na značaj formiranja i djelovanje Četvrtе viteške motorizovane brigade, kojoj je zbog doprinosa u odbrani domovine 28. jula 1994. godine dodijeljen počasni naziv "viteška".

Brigada kojom je komandovao Fikret Prevljak, izrasla je iz naroda Hrasnice, Sokolović Kolonije i Butmira, koji se goloruk, u farmerkama i patikama, organizovao i kao takav suprotstavio nadmoćnijem neprijatelju sa željom da odbrani slobodne prostore Ilidže.

Četvrtа viteška motorizovana brigada po sastavu je bila multinacionalna i multikonfesionalna jedinica. Rame uz rame ovaj dio Sarajeva branili su i žvоte za ovu domovinu položili Bošnjaci, Srbi, Hrvati, Albanci, Mađari, Romi... Veliki doprinos u odbrani dale su i žene, majke, sestre, svako na svoj način, kako bi agresora i zlo koje se nadvilo nad ilidžanskim naseljima zaustavilo u namjeri da uništi ova područja i njeno stanovništvo.

Kroz redove brigade prošlo je više od 10.000 vojnika, od kojih je 1.132 zbog ranjavanja dobilo status ratnog vojnog invalida. Najvećim ratnim priznanjem "Zlatni ljiljan" odlikovana su 33 pripadnika, od toga njih 11 posthumno, a tri pripadnika odlikovana su Ordenom. Život za odbranu Bosne i Hercegovine dalo je 425 boraca brigade.

Zona odgovornosti Četvrtе viteške motorizovane brigade predstavljala je glavnu arteriju za funkcionisanje države. Tokom agresije čuvalа je Hrasnicu, Sokolović Koloniju, slobodne teritorije Ilidže i područje Igmana. Sprječavala je ulazak agresora u opkoljeno Sarajevo, učestvovalа u izgradnji Tunela D-B, te čuvalа njegovu prohodnost, brinula o opskrbi glavnog grada strujom, naftom, hranom i drugim potrepštinama. Brigada je učestvovalа u velikom broju operacija, od Ilidže do Bihaća.

Finansijska sredstva za 36 projekata Općina Ilidža prvi put dodijelila putem javnih poziva

PODRŠKA ZA 20 BORAČKIH UDRUŽENJA

Načelnik Općine Nermin Muzur uručio je ugovore o dodjeli finansijskih sredstava za 20 boračkih udruženja sa područja općine Ilidža, koja su prvi put izabrana po osnovu provedenih javnih poziva za finansiranje redovnih djelatnosti i projektnih aktivnosti udruženja.

- Implementirali smo Odluku Općinskog vijeća Ilidža kojom je propisano da se sredstva boračkim udruženjima dodjeljuju

putem javnih poziva, što ranijih godina nije bila praksa već su sredstva dodjeljivana kroz budžet ili po zahtjevima. Ovim smo željeli unaprijediti dodjelu sredstava kako bi ona bila što transparentnija - kazao je načelnik Muzur.

Po javnim pozivima finansirano je 20 udruženja, od toga 19 za redovne djelatnosti, dok je za projektne aktivnosti finansirano 16 udruženja koja će realizovati ukupno 36 projekata.

Iz rječnih korita su uklanjani nasipi zemlje i pijeska te rastinje i otpad

USPJEŠNO OČIŠĆENI VODOTOCI NA ILIDŽI



Čišćenje korita Željeznice

Na Petoj redovnoj sjednici Štaba civilne zaštite Općine Ilidža koja je održana 31. augusta usvojen je Plan mjera čišćenja i uređenja vodotoka na području Općine Ilidža.

U cilju preventivnih mjera u sprječavanju poplava koje mogu ugroziti ljude i materijalna dobra iz korita su uklanjani nasipi zemlje i pijeska te rastinje i otpad.

Planom su bile obuhvaćene rijeke Bosna, Miljacka, Željeznica, Zujevina, Dobrinja, Tilava i Večera, te Rakovički, Bistrički i Zenički potok kao i Trnava, Bunica, Grabovine ali i odvodni kanali pored saobraćajnica.

Za realizaciju ovih aktivnosti angažovano je JP Ilidža i povjerenici Civilne zaštite, a cijelim procesom koordinirala Služba Civilne zaštite i Štab Civilne zaštite sa Službom za razvoj, komunalne poslove i puteve i Stručnom službom za koordinaciju rada mjesnih zajednica.

Projekt vrijednosti 1.224.865 KM finansiralo je Ministarstvo saobraćaja KS preko Direkcije za puteve

U PROMETU ISKLJUČNA TRAKA ZA OSJEK

Isključna traka sa saobraćajnice Zapadni prilaz gradu puštena je u promet nakon što su je obišli načelnik Općine Ilidža Nermin Muzur, ministar saobraćaja Kantona Sarajevo Adnan Šteta i direktor Direkcije za puteve KS Selmir Kovač.

Načelnik Muzur iskazao je zadovoljstvo saradnjom sa Ministarstvom saobraćaja i Vladom KS, te istakao kako je ovaj projekt od izuzetne važnosti za sve stanovnike Ilidže.

Projekt vrijednosti 1.224.865,32 KM u potpunosti je finansiralo Ministarstvo saobraćaja KS preko Direkcije za puteve.

Izvođač radova na ovom projektu bila je kompanija Bosman, a stručni nadzor vršio je IPSA institut.



Ministar Šteta i načelnik Muzur

Sredstva za unaprjeđenje rada ilidžanske policije izdvojena su iz Budžeta za 2021. godinu

PETOJ POLICIJSKOJ UPRAVI OPĆINA ILIDŽA URUČILA OPREMU VRIJEDNU 50.000 KM

Načelnik Općine Ilidža Nermin Muzur i Redžo Lemezan, zamjenik predsjedavajućeg Općinskog vijeća Ilidža, uručili su opremu vrijednosti 50.000 KM Petoj policijskoj upravi MUP-a KS.

U Budžetu za 2021. godinu Općina Ilidža izdvojila je sredstva za ovu namjenu, te po specifikacijama koje su dostavljene od strane Policijske uprave, izvršila nabavku opreme.

- S obzirom na to da je sigurnost naših građanskih i građana jedno od najvažnijih pitanja, trudimo se da kontinuirano pružamo podršku radu naše policije. Izvršili smo nabavku i ove izuzetno vrijedne opreme, nakon što smo prethodno nabavili bicikla za potrebe Pete policijske uprave. Mi ćemo i dalje komunicirati i sarađivati te ćemo pružati podršku u skladu sa mogućnostima i nadamo se da će naš doprinos unaprijediti uslove i rad pripadnika Pete policijske uprave - istakao je načelnik Muzur.

Općina Ilidža je u augustu uručila dva bicikla sa specijaliziranim



Načelnik Muzur sa pripadnicima Pete policijske uprave MUP-a KS

opremom koja su nabavljena po specifikacijama koje je dostavila Peta policijska uprava, a za potrebe unaprjeđenja rada policije na teritoriji općine Ilidža.

Mladi pijanista Omar Halilović zablistao na prestižnom internacionalnom takmičenju u New Yorku

MUZUR UGOSTIO SVJETSKOG PRVAKA



Načelnik Općine Ilidža nagradio uspjeh talentovanog pijaniste Omara Halilovića

Općina Ilidža Omaru je dodijelila novčanu nagradu za ostvaren uspjeh te je dogovorena saradnja sa JU Osnovna muzička škola Ilidža kako bi kroz zajednički projekt promovisali talentovane učenike

Načelnik Općine Ilidža Nermin Muzur održao je prijem za svjetskog prvaka i pijanistu Omara Halilovića, učenika četvrtog razreda Osnovne muzičke škole na Ilidži.

Omar je na prestižnom internacionalnom takmičenju "Suzanne Culley" u New Yorku osvojio prvo mjesto, a pozvan je da 29. juna 2022. godine svira na Winners Gala koncertu u Carnegie Hallu.

- Izuzetan je uspjeh što je ušao među deset najboljih takmičara i smatrali smo da je to njegov najveći uspjeh do sada. Nakon što smo dobili informaciju da je osvojio prvo mjesto i zlatnu medalju bili smo nevjerovatno ponosni i sretni. Pobjedu je ostvario sa Mjesečevom sonatom od Beethovena, koja je izuzetno kompleksna - kazao je Omarov nastavnik, Amsal Ganović.

Bisera Halilović, Omarova majka, istakla je da kao roditelji pružaju svu moguću podršku sinu te da je nekad izuzetno teško osigurati sve uslove za razvijanje njegovog talenta, kao i finansiranje učešća na takmičenjima, s obzirom na to da ne postoji sistemsko rješenje podrške uspješnim učenicima.

Načelnik Muzur je naglasio da je sretan što je upoznao Omara te da je pratio njegov rad i sa oduševljenjem slušao kako svira klavir.

- Sretan sam i ponosan što naš Omar predstavlja uspješno našu državu na svjetskim takmičenjima i želim mu se zahvaliti na tome i poželjeti mu puno sreće u njegovom daljnjem radu i učenju. Izuzetno malo pažnje se posvećuje obrazovanju, kulturi, sportu i mladima i želimo to promijeniti. Općina Ilidža u proteklom periodu naglasak je stavila na podršku mladima jer želimo da u sklopu svojih mogućnosti pomognemo njihovom razvoju i talentima. U narednom periodu sigurno ćemo još više finansijskih sredstava planirati za mlade i talentirane učenike - kazao je načelnik Općine Nermin Muzur.

Općina Ilidža je Omaru dodijelila novčanu nagradu za ostvaren uspjeh te je dogovorena saradnja sa JU Osnovna muzička škola Ilidža kako bi kroz zajednički projekt promovisali talentovane učenike ove škole, a kroz prigodne aktivnosti koje će se realizirati na području općine.

U organizaciji sa Muzičkom produkcijom BHRT-a održan koncert pod nazivom "Sevdah na Ilidži"

ILIDŽA SEVDALINKU ČUVA OD ZABORAVA

Opredijeljenost očuvanju kulturne baštine Bosne i Hercegovine Općina Ilidža pokazala je i 8. septembra kada je u organizaciji sa Muzičkom produkcijom BHRT-a održan koncert pod nazivom "Sevdah na Ilidži".

Uz besplatan ulaz i poštivanje svih epidemioloških mjera, građani i građanke Ilidže i gosti iz drugih bh. gradova uživali su

u interpretacijama sevdalinke Hanke Paldum, Nedžada Salkovića, Ferida Avdića, Enesa Begovića i drugih pjevača.

Načelnik Općine Ilidža Nermin Muzur je u ime organizatora koncerta nagradu "Duša sevdaha" uručio "princu sevdalinke" Nedžadu Salkoviću, koji je i ranije osvajao slične nagrade na festivalima na Ilidži.

Savjetnik za borbu protiv korupcije i upravljanja kvalitetom

ERIK LARSON U POSJETI: OPĆINA ILIDŽA PRIMJER I MODEL ZA SVE OPĆINE U KS



Druga posjeta Erika Larsona Općini Ilidža

Drago mi je kada čujem izjave da se nešto ne može uraditi, a moj odgovor bude da itekako može, jer je Ilidža to već uradila, rekao je savjetnik Erik Larson prilikom njegove druge posjete Općini Ilidža

U posjeti načelniku Općine Ilidža Nerminu Muzur i rukovodstvu Općinskog vijeća, boravili su savjetnik za borbu protiv korupcije i upravljanja kvalitetom KS, Erik Larson, i šef Ureda za borbu protiv korupcije i upravljanja kvalitetom Kantona Sarajevo, Erduan Kafedžić.

Općinski načelnik Nermin Muzur izrazio je zadovoljstvo na novoj posjeti te informisao prisutne o aktivnostima koje je Općina Ilidža realizirala u proteklom periodu.

- Radimo i dalje na aktivnostima koje za cilj imaju poboljšanje transparentnosti rada, usklađenosti poslovanja sa zakonskim odredbama i uspostavljanjem efikasne javne uprave. Formirali smo posebnu službu koja će se baviti ovim oblastima i naše opredjeljenje je da pronalazimo što efikasnije mehanizme za smanjenje prostora za svaki vid korupcije - kazao je načelnik Muzur.

Gospodin Erik Larson iskazao je zadovoljstvo što je ponovo u Općini Ilidža i istakao da je to prvi put da ponovo posjećuje neku od općina u kojima je već bio, što mnogo govori o tome da Općina Ilidža izuzetno efikasno provodi svoje aktivnosti.

- Prije svega se želim zahvaliti Općini Ilidža na saradnji sa Uredom, pristupanju registrima kao i svim aktivnostima na kojima sarađujemo. Izuzetno je bitno da kada se provode određene aktivnosti to bude i vidljivo. Što se tiče Ilidže, zaista jeste vidljivo sve što radite. Mogu potvrditi da je Općina Ilidža primjer i model za sve druge općine u Kantonu Sarajevo kako treba raditi. Drago

mi je kada čujem izjave da se nešto ne može uraditi, a moj odgovor bude da itekako može jer je Ilidža to već uradila - rekao je savjetnik Larson.

Šef Ureda za borbu protiv korupcije Erduan Kafedžić iskazao je zadovoljstvo na efikasnoj saradnji sa Općinom Ilidža te je izrazio nadu da će ovakav vid saradnje biti i sa ostalim općinama u KS.



Kafedžić, Muzur i Larson

Načelnik Muzur se zahvalio gospodinu Larsonu i Uredu na saradnji u svim projektima koje Općina i Ured zajedno realiziraju i istakao još jednom zadovoljstvo na podršci u radu Općine i općinske administracije.

Centar za zdravo starenje obilježio prvu godišnjicu postojanja

KORISNICI CENTRA ZA ZDRAVO STARENJE URUČILI ZAHVALNICU NAČELNIKU MUZURU

Načelnik Općine Ilidža Nermin Muzur posjetio je Centar za zdravo starenje u Hrasnici koji je u 2021. godini obilježio prvu godišnjicu postojanja.

Općina je u saradnji sa Udruženjem Partnerstvo za javno zdravlje potpisala Memorandum o razumijevanju u svrhu realizacije uspostave ovog centra. Tom prilikom, predstavnici i korisnici centra uručili su načelniku Muzuru prigodan poklon koji su sami izradili u znak zahvalnosti Općini Ilidža za podršku radu ovog centra.

- Zadovoljstvo mi je prisustvovati ovakvim događajima. Drago mi je što imam priliku upoznati i družiti se sa korisnicima ovog centra. Općina Ilidža će nastaviti podržavati rad centra te smo planirali otvoriti i novi na drugoj lokaciji - kazao je načelnik Muzur.

U centru se organizuju različite aktivnosti za stariju populaciju. od korektivne gimnastike, kulinarskih aktivnosti, igranja društvenih igara, pa do učenja stranih jezika i rada na računaru. Rad Centra za zdravo starenje u potpunosti finansira Općina Ilidža koja je za ovu namjenu ustupila i općinski prostor.



Načelnik Muzur uručio ugovore

Unaprjeđenje spremnosti naših vatrogasaca



VATROGASNO DRUŠTVO ILIDŽA DOBILLO OPREMU

Služba civilne zaštite Općine Ilidža izvršila je nabavku vatrogasne opreme na trajno korištenje Službi zaštite i spašavanja od požara Općine Ilidža, formirane u Vatrogasnom društvu Ilidža za provođenje aktivnosti zaštite od požara.

Tim povodom, načelnik Općine Ilidža Nermin Muzur, posjetio je Vatrogasno društvo Ilidža u Osjeku i uručio opremu.

- Važno je da službe zaštite i spašavanja budu adekvatno opremljene kako bi u slučaju potrebe mogle odgovoriti zadatku. U skladu sa trenutnim mogućnostima nabavili smo potrebnu vatrogasnu opremu koja će sigurno unaprijediti spremnost i rad naših vatrogasaca - izjavio je načelnik Muzur.

Vatrogasci Vatrogasnog društva Ilidža zahvalili su se načelniku Muzuru i Općini Ilidža te istakli da su na raspolaganju za sve što bude potrebno i gdje budu mogli dati svoj doprinos.

Izbor održan jedanaestu godinu zaredom

NAJLJEPŠA DVORIŠTA I BALKONI SA CVJETNIM ARANŽMANOM U 2021.



Općina Ilidža, jedanaestu godinu zaredom, organizovala je izbor najljepšeg dvorišta i balkona sa cvjetnim aranžmanom, a sa ciljem očuvanja tradicije ilidžanskih bašti, ali i podizanja svijesti građana o značaju očuvanja životne sredine i poboljšanja turističke ponude.

Za najljepše dvorište prva nagrada pripala je Spomenki Markulj sa Stupa, drugo mjesto osvojila je Azra Galošević iz Butmira, a treće mjesto Sena Sinanović iz Rakovice. Prvo mjesto za najljepši balkon sa cvjetnim aranžmanom pripalo je Lejli Karačić-Bešić sa Stupa, drugo Hadiji Skalonjić iz Hrasnice, a treće Muameru Osmanbegoviću iz Lužana.

Na stručnom osposobljavanju u Općini Ilidža



Mladi potpisali jednogodišnje ugovore

PRVO RADNO ISKUSTVO ZA 45 MLADIH OSOBA

Potpisom ugovora 45 mladih steći će prvo radno iskustvo u Općini Ilidža. Među osobama koje će obaviti stručno osposobljavanje bez zasnivanja radnog odnosa nalaze se pravnici, ekonomisti, žurnalisti, arhitekta, politolozi i drugi.

Nakon čega su potpisani ugovori za njihovo jednogodišnje stručno osposobljavanje bez zasnivanja radnog odnosa, načelnik Općine Ilidža Nermin Muzur mladima je poželio dobrodošlicu u Multifunkcionalnoj sali.



Kenan Kovačević i načelnik Muzur

Odlukom općinskog načelnika među osobama na stručnom osposobljavanju bez zasnivanja radnog odnosa u Općini Ilidža bit će i Kenan Kovačević, osoba sa Down sindromom.

Kenan je završio Srednju tehničku školu grafičkih tehnologija dizajna i multimedije na Ilidži, aktivno se bavi plivanjem te osvaja medalje na međunarodnim takmičenjima. One je iskazao želju i interes da prvo radno iskustvo stekne na fotokopirnici Općine Ilidža te je potpisao ugovor na šest mjeseci.

- Kenan je uputio molbu i izrazio želju da prvo radno iskustvo stekne u Općini i za nas uopće nije bilo upitno da li da mu ispunimo tu želju. Kroz zakonske mehanizme omogućili smo Kenanu da sa svojom stručnom spremom bude na stručnom osposobljavanju bez zasnivanja radnog odnosa u Općini Ilidža te da na taj način stekne neophodno radno iskustvo. Jako je vedar, nasmijan i vrijedan momak i zaista se radujemo što je sa nama - kazao je načelnik Muzur.

Kenan je istakao da se raduje što će imati priliku da u narednom periodu radi na fotokopirnici, spreman je za nove radne pobjede i nada se da će opravdati očekivanja.

Općina olakšala proces prijave komunalnih problema



Prijave se mogu slati na Viber broj 061 464 614

USPOSTAVLJEN VIBER BROJ ZA PRIJAVE O KOMUNALNOJ HIGIJENI

Općina Ilidža uspostavila je Viber broj na koji građani mogu dostaviti svoje prijave koje se odnose na komunalnu higijenu na području općine Ilidža, (deponije smeća, otpad na javnim površinama, neuređena mjesta za kontejnere, zarasle javne površine, neuređeni vodotoci i druge).

Građani u porukama koje dostavljaju putem Viber broja, trebaju pojasniti predmetnu situaciju i lokalitet te eventualno priložiti fotografije.

Prijave o komunalnoj higijeni na području općine Ilidža se mogu slati na Viber broj 061 464 614.

Po Javnom pozivu za dodjelu novčanih sredstava

PODRŽANO 17 PROJEKATA NEPROFITNIH UDRUŽENJA I HUMANITARNIH ORGANIZACIJA

U Općini Ilidža održano je svečano potpisivanje ugovora sa humanitarnim udrugama i neprofitnim organizacijama, dobitnicima sredstava po Javnom pozivu za sufinansiranje projekata iz oblasti: rad sa osobama sa invaliditetom, socijalne usluge, unaprjeđenje standarda ranjivih kategorija, prevencija bolesti ovisnosti i humanitarne djelatnost.

- Izuzetno nam je bitno da podržimo sve kvalitetne projekte koji će se realizirati na području općine Ilidža, a ovim javnim pozivom bile su obuhvaćene posebne oblasti i kategorije društva. I u budućnosti ćemo nastojati da pronalazimo najbolje mehanizme podrške za projekte koji za cilj imaju unaprjeđenje potreba lokalnog stanovništva - istakao je načelnik Općine Ilidža Nermin Muzur.

Općina Ilidža podržala je projektne prijedloge koji se odnose na školu plivanja osoba sa invaliditetom, rehabilitaciju djece i omladine oboljelih od distrofije, zdravstvene radionice za djecu sa poteškoćama u razvoju, kurseve znakovnog jezika, rehabilitaciju i pomoć bolesnim članovima paraplegičarima i kvadrilegičarima u kućnim uslovima, kućnu njegu starih i iznemoglih i nepokretnih osoba, nutricionističku edukaciju za kvalitetniju bezglutensku prehranu, poboljšanje psihosocijalnog stanja osoba sa intelektualnim poteškoćama kroz kreativna izražavanja, osnaživanje djece i omladine sa privremenim ili trajnim gubitkom kose i promocija društvenog poduzetništva.

Načelnik Općine Ilidža Nermin Muzur proglasio stanje prirodne nesreće od poplava



Rekordni vodostaj rijeke Željeznice

POPLAVA KAKVA SE NE PAMTI: ADEKVATNA REAKCIJA OPĆINE SPRIJEČILA KATASTROFU

Velika količina padavina rezultirala je rekordnim vodostajem rijeke Željeznice, koja se izlila iz korita, a velike štete prouzrokovala je posebno u Otesu, ali i drugim mjesnim zajednicama na našoj općini

Novembar 2021. godine Ilidžanci koji žive u mjesnim zajednicama Donji Kotorac, Butmir, Vreoca, Osjek i Blažuj, a pogotovo u Mjesnoj zajednici Otes, dugo će pamti po poplavi kakve se ne sjećaju ni najstariji stanovnici naše općine.

Velika količina padavina rezultirala je rekordnim vodostajem rijeke Željeznice, koja se izlila iz korita, a velike štete prouzrokovala je posebno u Otesu, dok se rijeka Tilava izlila u Donjem Kotorcu i Butmiru.

Velikim angažmanom jedinica Službe civilne zaštite Općine Ilidža te Kantonalne civilne zaštite, Federalne civilne zaštite, gorskih službi spašavanja, vatrogasnih društava i policije, prilično teška situacija, koja je vlada 5. novembra na pojedinim dijelovima općine Ilidža, uspješno je stavljena pod kontrolu.



Vanredna sjednica Štaba civilne zaštite Općine Ilidža

Tokom devet vanrednih sjednica Štaba civilne zaštite Općine Ilidža nastojala je iznaći najbolja rješenja kako bi reakcija na terenu bila adekvatna, da bi već 7. novembra na prijedlog Štaba civilne zaštite Općine Ilidža, načelnik Nermin Muzur donio Odluku o proglašenju stanja prirodne nesreće od poplava u mjesnim zajednicama Donji Kotorac, Butmir, Otes, Osjek, Blažuj i Vreoca.

Na osnovu Odluke o proglašenju stanja prirodne nesreće od poplava građanima iz mjesnih zajednica koje su pogođene omogućeno je da već od 8. novembra mogu prijaviti štete.

Nakon povlačenja vode sa poplavljenih površina Općina Ilidža upozorila je građane i na povećan rizik od neeksplozivnih ubojnih sredstava koje su bujice donijele u naseljena područja.



Načelnik Muzur na terenu je pratio stanje i situaciju

Nakon velikih poplava na području naše općine

MUFTIJA SARAJEVSKI POSJETIO ILIDŽU



U društvu načelnika posjetili Otes i Butmir

Muftija sarajevski, dr. Nedžad ef. Grabus, glavni imam Medžlisa Islamske zajednice Sarajevo, dr. Abdulgafar ef. Velić, rukovodilac Ureda za društvenu brigu Rijasetu Islamske zajednice u Bosni i Hercegovini, Ibrahim ef. Malanović, te Ferid ef. Ganić i Resul ef. Alić posjetili su Općinu Ilidžu.

Doktor Nedžad ef. Grabus posjetio je i općinskog načelnika Nermina Muzura kako bi iskazao podršku Muftijstva sarajevskog te kako bi zajedno obišli mjesne zajednice koje su bile najpogođenije u novembarskim poplavama.

Načelnik Muzur, izrazio je zahvalnost ef. Grabusu, kao i cijeloj delegaciji na posjeti tokom koje su boravili u mjesnim zajednicama Otes i Butmir.

U Butmiru su načelnik Muzur i njegovi gosti proučili Fatihu na mezarju u haremu džamije kao i na mezarima bivšeg načelnika Amera Čenanovića i Abdulaha ef. Kubata.

Osma redovna sjednica Općinskog vijeća Ilidža

MARKO JAŠAR IMENOVAN ZA NOVOG PRAVOBRANIOCA OPĆINE ILIDŽA

Odlukom Općinskog vijeća Općine Ilidža na Osmoj redovnoj sjednici funkcije v.d. pravobranioca Općine Ilidža razriješena je Emina Musić, a za novog pravobranioca imenovan Marko Jašar.

Općinsko vijeće Ilidža usvojilo je i Izvještaj o izvršenju Budžeta Općine Ilidža za period 1. januar - 30. septembar 2021. godine, kao i Periodični finansijski izvještaj za isto razdoblje.

Odlukom Općinskog vijeća smijenjeni su predsjednik i dva člana Skupštine Javnog preduzeća za obavljanje komunalnih i drugih djelatnosti od javnog interesa Općine Ilidža "Ilidža" čiji izvještaj za 2020. godinu nije usvojen.

Usvojena je i Odluka o raspisivanju javnog poziva za predlaganje

kandidata za dodjelu priznanja Općine Ilidža, a Općinsko vijeće usvojilo je i Odluku o donaciji za Javnu ustanovu "Studentski centar" Sarajevo.

Prihvaćen je i usvojen prijedlog o pokretanju procedure bratimljenja između Općine Ilidža i Općine Caycuma u Turskoj.



Osnivač Univerziteta Sarajevska škola za nauku i tehnologiju prezentirao planove za budućnost

NAČELNIK OPĆINE ILIDŽA NERMIN MUZUR UGOSTIO AKADEMIKA EJUPA GANIĆA

Općinski načelnik Nermin Muzur održao je sastanak s prof. dr. Ejupom Ganićem. S bivšim članom Predsjedništva Republike Bosne i Hercegovine načelnik Općine Ilidža razgovarao je o brojnim temama, no fokus je bio na planovima koje Univerzitet Sarajevska škola za nauku i tehnologiju (SSST) planira realizirati u budućnosti.

Tokom ugodnog razgovora s osnivačem SSST-a, načelnik Muzur istakao je kako mu je posebno drago što je ovaj univerzitet baš Ilidžu odabrao za svoje sjedište u kojem će mladi ljudi stjecati nova znanja i vještine, što je svakako pozitivna stvar za svaku lokalnu zajednicu, pa tako i Ilidžu.

Akademik Ganić upoznao je načelnika Muzura s daljnjim planovima razvoja SSST-a, kazavši da je SSST opredijeljen ka konstantnom razvoju, što potvrđuje i činjenica da je nedavno postao prvi univerzitet četvrte generacije u regionu koji sada raspolaže s inovacijskim laboratorijem.



Akademik Ejup Ganić, bivši član Predsjedništva RBiH

Načelnik Muzur poručio je kako je važno što SSST ima jasnu viziju boljeg i kvalitetnijeg okruženja kroz kreiranje prilika za otvaranje novih radnih mjesta na teritoriji Općine Ilidža.

Održana Tematska sjednica Općinskog vijeća Ilidža



Načelnik Općine Ilidža, Nermin Muzur

RJEŠAVANJE PROBLEMA VODOZAŠTITNE ZONE

Sjednici su prisustvovali i članovi Vlade Kantona Sarajevo predvođeni premijerom Edinom Fortom, zastupnici u Skupštini KS, direktor Zavoda za planiranje razvoja KS i predstavnici drugih organa

Tematska sjednica Općinskog vijeća Ilidža na kojoj je razmatran problem vodozaštitne zone održana je 16. novembra u kongresnoj sali Hotela Hills.

Pored 25 općinskih vijećnika sjednici su prisustvovali i članovi Vlade Kantona Sarajevo predvođeni premijerom Edinom Fortom, zastupnici u Skupštini Kantona Sarajevo, direktor Zavoda za planiranje razvoja Kantona Sarajevo i predstavnici drugih organa uprave i institucija.

Kroz slikovitu prezentaciju općinski načelnik Nermin Muzur predstavio je glavninu problema koji se tiče vodozaštitne zone.

- Općina Ilidža je jedina općina u kojoj prirodno bogatstvo predstavlja teret i limitirajući faktor razvoja i održivog života - kazao je načelnik.

On je istakao da je to problem koji traje godinama unazad, a govorio je i o blizu hiljadu bespravno izgrađenih objekata u vodozaštitnoj zoni i otpada u određenim dijelovima.

Načelnik Muzur naglasio je potrebu za izradom novog elaborata koji će pomoći pri rješavanju ovog problema, te poručio da se politika ostavi po strani, kako bi fokus ostao na pomenutom problemu.

- Sigurno je da uz dobru volju, a u skladu sa važećim normama koje regulišu pitanja dobara od općeg interesa sa jedne i prava vlasnika sa druge strane, a u vezi općeg interesa zaštite izvorišta pitke vode, postoji način za pronalaženje adekvatnog rješenja i balansa između općih i posebnih interesa svih građana - rekao je načelnik Muzur, naglasivši kako građani nisu u mogućnosti da svoju imovinu adekvatno iskoriste.

Kantonalni premijer Edin Forto u svom izlaganju skrenuo je pažnju na problem ljudskih prava, odnosno nemogućnost raspolaganja privatnom imovinom. Građani u takvoj situaciji, imovinu ne mogu prodavati, niti obrađivati, a pritom im nije osiguran nikakav povrat sredstava. Također je naveo kako je važno da se u rješavanje ovog problema uključe i entiteti, s obzirom na to da entitetska granica prolazi kroz vodozaštitnu zonu.



Edin Forto, premijer Vlade KS

Ministar privrede Kantona Sarajevo, Adnan Delić, dao je prijedlog o formiranju interesorne komisije koja će analizirati trenutni Elaborat o zaštiti izvorišta vode za piće Sarajevsko polje te izvršiti procjenu o izradi novog. Kao jedno od mogućih rješenja je preusmjeravanje vodosnabdijevanja Kantona Sarajevo sa izvorišta Crna rijeka.

Prisutnima su se obratili i vijećnici Općine Ilidže, te bivši uposlenici. Kao i ostali govornici iznijeli su svoje mišljenje u vezi pomenutog problema, te dali punu podršku u njegovom rješavanju.

Dan državnosti Bosne i Hercegovine obilježen Svečanom sjednicom Općinskog vijeća Ilidža

Rukovodstvo Općine Ilidža

VRIJEDNOSTI PRVOG ZASJEDANJA ZAVNOBIH-A ODBRANJENE SU TOKOM AGRESIJE NA BIH

U noći sa 25. na 26. novembar 1943. godine, na Prvom zasjedanju ZAVNOBIH-a u Mrkonjić Gradu donesena je odluka o obnovi državnosti Bosne i Hercegovine te su potvrđene njene historijske granice koje datiraju iz doba srednjovjekovne Bosne, kazao je općinski načelnik Nermin Muzur

Povodom 25. novembra, Dana državnosti Bosne i Hercegovine, održana je Svečana sjednica Općinskog vijeća Ilidža.

U obraćanju brojnim zvanicima načelnik Općine Ilidža, Nermin Muzur, govorio je o historijskom značaju Prvog zasjedanja Zemaljskog antifašističkog vijeća narodnog oslobođenja Bosne i Hercegovine.

- U noći sa 25. na 26. novembar 1943. godine, na Prvom zasjedanju ZAVNOBIH-a u Mrkonjić Gradu donesena je odluka o obnovi državnosti Bosne i Hercegovine te su potvrđene njene historijske granice koje datiraju iz doba srednjovjekovne Bosne. Najvažniji zaključak ZAVNOBIH-a bio je da je Bosna i Hercegovina definisana kao jedinstvena, nedjeljiva i onakva u kakvoj će svi njeni građani imati jednaka prava - kazao je općinski načelnik Nermin Muzur, te dodao:

- Vrijednosti sa Prvog zasjedanja ZAVNOBIH-a iz 1943. godine naši najbolji sinovi i kćeri su branili u agresiji na Bosnu i Hercegovinu u periodu od 1992. do 1995. godine. Hvala Bogu, što mi svjedočimo da su ih uspjeli odbraniti. Na Ilidži dobro znamo kako je bilo tokom agresije braniti ono što je definisano 1943. godine. Naši djedovi, očevi, braća, majke i sestre dali su živote, dijelove svojih tijela, neki su dali možda najbolje godine života, da bi se mi mogli okupljati i obilježavati godišnjicu jednog od najznačajnijih datuma u historiji Bosne i Hercegovine.

Načelnik Muzur naglasio je kako važnost lokalnih zajednica u funkcionisanju države uopće nije beznačajna, naprotiv.

- Mi u Općini Ilidža smatramo da su najvažnije ćelije u našoj

domovini, državi Bosni i Hercegovini, upravo lokalne zajednice i općine. S toga našim trudom, radom i zalaganjem nastojimo biti najzdravija, najjača i najbolja ćelija Bosne i Hercegovine jer istinski vjerujemo da je to najbolji put prosperiteta, očuvanja i napretka naše zemlje - poručio je općinski načelnik te se neizmjereno zahvalio svim prisutnim što su dali nesebičan doprinos na tom putu.

Predsjedavajući Općinskog vijeća Ilidža, Tarik Stambolić, podsjetio je kako nam principi utvrđeni na Prvom zasjedanju ZAVNOBIH-a nikad nisu bili potrebni.

- Principi utvrđeni na Prvom zasjedanju ZAVNOBIH-a, nikad nam nisu bili potrebni. Zato vas molim da sa ove sjednice Općinskog vijeća prenesemo ljubav i osjećaj pripadnosti našoj domovini Bosni i Hercegovini te da u ovom vremenu punom izazova imamo povjerenje jedni u druge i da budemo istrajni u izgradnji stabilne i moderne Bosne i Hercegovine - poručio je predsjedavajući Općinskog vijeća Ilidža, Tarik Stambolić.

U sklopu obilježavanja Dana državnosti BiH delegacija Općine Ilidža predvođena načelnikom Nerminom Muzurom, predsjedavajućim Općinskog vijeća Ilidža Tarikom Stambolićem i njegovim zamjenicima Samirom Avdićem i Redžom Lemezanom, odala je počast šehidima i poginulim borcima polaganjem cvijeća na Centralnom spomen obilježju Ilidža i na Spomeniku borcima NOR-a na Ilidži.

Obilježavanju Dana državnosti BiH prisustvovali su i predstavnici političkih partija, udruženja i boračkih organizacija sa područja općine Ilidža.

Prva u Federaciji Bosne i Hercegovine nakon 30 godina

OPĆINA ILIDŽA AVIOSNIMANJEM ZAPOČELA OBNOVU PREMJERA



Sporazumom sa Federalnom upravom za geodetske i imovinsko-pravne poslove definisane obaveze u cilju provođenja ovog projekta

Još ranije smo iskazali našu punu opredijeljenost da kroz saradnju s najvišim nivoima vlasti unaprijedimo stanje u našoj lokalnoj zajednici. Početak obnove premjera na području Vlakova možemo nazvati historijskim za općinu Ilidža, ali i sve njene stanovnike, rekao je načelnik Muzur

Nakon temeljitih priprema, uspostavljanja pravnog okvira i definisanih zadataka, 24. decembra 2021. godine, aviosnimanjem Vlakova, tačnije katastarske općine Vlakovo, počela je obnova premjera na području općine Ilidža, što je od izuzetnog značaja za stanovnike naše lokalne zajednice i s pravom se može nazvati historijskim projektom.

Ovaj datum ostat će upamćen kao pionirski korak naše lokalne zajednice koji će na kraju iznjediti Katastar nekretnina, tačnu, pouzdanu i jedinstvenu evidenciju o nekretninama, prvu takve vrste u FBiH još od osamdesetih godina prošlog stoljeća, ali i prvu u historiji Ilidže.



Nakon što je krajem septembra 2021. godine Općinsko vijeće Ilidža usvojilo Odluku o obnovi premjera na području općine Ilidža potpisan je Sporazum sa Federalnom upravom za geodetske i imovinsko-pravne poslove te su definisane obaveze u cilju provođenja ovog projekta.

- Još ranije smo iskazali našu punu opredijeljenost da kroz saradnju s najvišim nivoima vlasti unaprijedimo stanje u našoj lokalnoj zajednici, s posebnim naglaskom da budemo servis našim građanima kakav oni zaista zaslužuju. Prvo aviosnimanje i početak obnove premjera na području Vlakova zaista možemo nazvati historijskim za općinu Ilidža, ali i sve njene stanovnike - rekao je načelnik Općine Ilidža Nermin Muzur.

Općinski načelnik naglasio je i kako je javna evidencija o nekretninama izuzetno važna polazna tačka za dugoročni razvoj naše općine, zbog čega je bitno da se efikasno riješe problemi sa kojima se naši građani susreću.

- Obnova premjera stvorit će pretpostavke i za adekvatnije prostorno planiranje, kao i za bolje upravljanje građevinskim zemljištem ali i drugim resursima naše lokalne zajednice - kazao je načelnik Muzur.

Važnost i značaj ovog projekta možda se najbolje oslikava i u interesu koji su pokazali stanovnici Vlakova tokom priprema za avionsko snimanje.

Zimska čarolija u Velikoj aleji kao prvi korak revitalizacije Velikog parka

Najmlađi ilidžanci pomogli načelniku da presječe vrpce i zvanično otvori klizalište

NAČELNIK NERMIN MUZUR OTVORIO PRVU LEDENU PLOHU NA ILIDŽI

Najmlađi stanovnici naše općine mogli su uživati u klizanju na ledenoj plohi, pored koje smo svim posjetiocima svakodnevno ponudili i mnoge druge sadržaje, kazao je načelnik Općine Ilidža Nermin Muzur, te pohvalio angažman Javnog preduzeća Ilidža na ovom projektu

Ledena ploha, koja je dugo pripremana u Velikom parku na Ilidži, otvorena 26. decembra 2021. godine.

Iako tog dana vremenski uslovi nisu bili idealni za klizanje i druženje, to nije spriječilo najmlađe stanovnike Ilidže da izađu na led.

Nakon što su sa načelnikom Općine Ilidža, Nerminom Muzurom, zvanično presjekli vrpce, najmlađi ilidžanci nisu znali sakriti radost i uzbuđenje zbog sadržaja kakvog nikada ranije nije bilo na teritoriji naše općine, pa su se trčeći zaputili ka ledenoj plohi.

- Možda su vremenski uslovi malo pokvarili malu svečanost, no bez obzira na to, najmlađi stanovnici naše općine mogli su uživati



Načelnik Muzur družio se s najmlađim ilidžancima

u klizanju na ledenoj plohi, pored koje smo svim posjetiocima svakodnevno ponudili i mnoge druge sadržaje - kazao je načelnik Muzur.

Općina Ilidža uložila je velike napore kako bi njeni građani mogli uživati u zimskoj čaroliji u Velikoj aleji, u neposrednoj blizini Spomenika borcima NOR-a, a angažman Javnog preduzeća Ilidža na ovom projektu pohvalio je i sam načelnik Muzur.

Ovo je tek prvi korak ka potpunoj revitalizaciji Velikog parka. Njegova rekonstrukcija, koja je planirana i kroz Budžet za 2022. godinu, trebala bi biti jedan od kapitalnih projekata Općine Ilidža u narednom periodu.



Klizalište iz zraka

Na Devetoj redovnoj sjednici Općinskog vijeća Ilidža

JEDNOGLASNO USVOJEN NAJVEĆI PRIJEDLOG BUDŽETA OPĆINE ILIDŽA



Prihvaćeni su svi predloženi amandmani

U Budžetu za 2022. godinu zadržane su stavke namijenjene za socijalnu zaštitu, podršku boračkoj populaciji, podršku oblasti sporta, kulture, obrazovanja i mladih, a povećana su izdvajanja koja se odnose na kapitalne projekte, čime je više od 50% budžeta namijenjeno kapitalnim investicijama

Deveta redovna sjednica Općinskog vijeća Ilidža rezultirala je jednoglasnim usvajanjem najvećeg Prijedloga budžeta ikada u redovnoj proceduri, a iznosi 38.120.000 KM.

U Budžetu za 2022. godinu zadržane su stavke namijenjene za socijalnu zaštitu, podršku boračkoj populaciji, podršku oblasti sporta, kulture, obrazovanja i mladih. Povećana su izdvajanja koja se odnose na kapitalne projekte, čime je više od 50% Budžeta namijenjeno kapitalnim investicijama, što ga čini razvojnim.

U radnoj i pozitivnoj atmosferi, kakvu su pohvalili vijećnici sa najdužim stažom u Općinskom vijeću Ilidža, prihvaćeni su svi predloženi amandmani.

Odlukom Općinskog vijeća Ilidža na funkciju predsjednika Općinske izborne komisije imenovana je Merima Imamović.

U cilju očuvanja bosanskog jezika podržan je Prijedlog Odluke o donaciji lektira Opštini Sjenica u Republici Srbiji, na šta je stavljen poseban naglasak. Pored toga, konstatovano je da ovu praksu treba nastaviti i u budućnosti te je i proširiti i na druge gradove ukoliko se za to ukaže potreba.

Usvojen je i Prijedlog Odluke o dodjeli priznanja Općine Ilidža za 2022. godinu, kao i Prijedlog Odluke o imenovanju investicionog menadžera Općine Ilidža za 2022. godinu. Općinsko vijeće usvojilo je i Nacrt Odluke o finansiranju/sufinansiranju boračkih udruženja/saveza i uputilo ga u javnu raspravu.

Načelnik Muzur ugostio najbolje studente s područja općine Ilidža, nagrađeni sa po 1.000 KM

SREBRENE ZNAČKE - SAVJETODAVNO TIJELO

Načelnik Općine Ilidža Nermin Muzur ugostio je dobitnike priznanja Srebrna značka Univerziteta u Sarajevu s područja općine Ilidža. Tom prilikom uručio im je novčane nagrade u iznosu od po 1.000 KM za ostvareni uspjeh. Kroz razgovor s načelnikom mladi su istakli kako svoju budućnost vide u BiH, gdje žele graditi profesionalne karijere.

Načelnik Muzur najavio je formiranje neformalnog savjetodavnog tijela u kojem će mladi svojim učešćem i idejama kreirati politike za unapređenje lokalne zajednice. To tijelo činit će Elma Hadžić, Adna Čohodar, Amila Bojičić, Amela Bajrektarević, Azra Pirović, Zejd Svraka, Vahidin Hasić, Isak Panjeta, Mehmed Čilaš i Enes Gičević.



Najbolji studenti na prijemu kod načelnika

Cilj povezivanje Ilidže sa Hadžićima i Trnovom*Asfaltirat će se skoro tri kilometra ratnog puta na Igmanu*

NAČELNIK MUZUR I MINISTAR ŠTETA OBIŠLI RATNI PUT

Načelnik Općine Ilidža Nermin Muzur u društvu ministra saobraćaja Kantona Sarajevo Adnana Štete i direktora Direkcije za puteve KS Selmira Kovača danas je obišao ratni put preko planine Igman. Uz načelnika Muzura put koji je tokom agresije na Bosnu i Hercegovinu bio žila kucavica Sarajeva posjetili su i predsjedavajući Općinskog vijeća Ilidža Tarik Stambolić, kao i dopredsjedavajući Samir Avdić.

Prilikom obilaska terena sagledana je trenutna situacija u kojoj se nalazi ratni put na Igmanu, a povod za to bilo je i pokretanje javne nabavke za izgradnju ovog puta, preciznije ceste od Glavogodine do Osmica na Igmanu.

- Očekujemo da će, ukoliko sve bude po planu, početak radova na ovom projektu biti na proljeće 2022. godine - najavio je ministar Šteta, koji je prethodno istakao važnost ovog projekta za sve stanovnike Kantona Sarajevo, uzevši u obzir njegov historijski značaj u proteklom ratu.

Ovaj projekt odnosi se na izgradnju ceste u dužini od skoro tri kilometra na području općine Ilidža.

- Važnost izgradnje ovog puta je višestruka, sa patriotske i historijske strane, ali i sa aspekta povezivanja Ilidže sa Trnovom i Hadžićima. Izgradnja ovog puta, koji je trenutno potpuno neuslovan, mnogo će značiti posjetiocima i uveliko će olakšati kretanje - naglasio je načelnik Općine Ilidža Nermin Muzur.

Načelnik Općine Ilidža Nermin Muzur potpisao

UGOVORI ZA PODRŠKU PROJEKTIMA ZA MLADE

Načelnik Općine Ilidža Nermin Muzur potpisao je ugovore s 14 udruženja za podršku projektima za mlade, za čiju realizaciju je izdvojeno ukupno 21.000 KM.

Općina Ilidža je i na ovaj način još jednom iskazala opredjeljenje za podršku mladima i njihovom neformalnom obrazovanju.

Podsjećanja radi, u skladu sa Strategijom prema mladima, općinski načelnik je 7. oktobra 2021. godine raspisao Javni poziv za (su)finansiranje projekata za mlade iz Budžeta Općine Ilidža za 2021. godinu.

Pravo prijave na Javni poziv imala su udruženja i fondacije čije je sjedište na području općine Ilidža i neformalne grupe mladih, uključujući i vijeća učenika srednjih škola (uz administrativnu podršku registrovanog udruženja koje se nalazi na području općine Ilidža) čiji su projekti namijenjeni mladim od 15 do 30 godina starosti.

Ovo je samo jedna od realizovanih aktivnosti kojom Općina Ilidža potvrđuje svoju naklonjenost mladima, ali i jasnu želju da kroz ove projekte pokuša unaprijediti njihov aktivizam i volonterski angažman a sve kako bi stekli nova znanja i vještine u neformalnom obrazovanju.

Program sufinansiranja samozapošljavanja

POTICAJNA SREDSTVA ZA 22 GRAĐANKE ILIDŽE

Na prijedlog Komisije za odabir poslovnih planova, načelnik Općine Ilidža Nermin Muzur, donio je Odluku o dodjeli sredstava za sufinansiranje samozapošljavanja žena s područja općine Ilidža.

Kroz ovaj program, čija ukupna vrijednost iznosi 167.200 KM, 22 aplikantice dobile su novčana sredstva za poticaj i podršku u svrhu registriranja samostalnih djelatnosti. Shodno Zakonu o radu, Općina Ilidža će u narednih 12 mjeseci isplaćivati poticajna sredstva za 22 žene.

Prvobitno je za ovaj program bilo planirano izdvojiti 104.000 KM, no zbog velikog broja aplikacija osigurane su dodatne 63.200 KM, kako bi aplikantice koje su ispunjavale sve formalno-pravne uslove dobile poticaj.

Općina Ilidža će osobama s kojima je zaključen ugovor, od dana njegovog potpisa, mjesečno isplaćivati poticajna sredstva u iznosu od 600 KM i to za sufinansiranje troškova doprinosa. Navedeni iznos uvećava se za 400 KM, a služit će za reguliranje troškova za registraciju samostalne djelatnosti, dok će sve druge eventualne troškove snositi korisnik sredstava.

- Svrha ovog programa bila je da pružimo što veću podršku građankama općine Ilidža. Nadam se da će ona biti tek inicijalna kapsula u razvoju njihovih djelatnosti - rekao je Nermin Muzur, načelnik Općine Ilidža, te naglasio kako će u 2022. godini sigurno biti nastavljena realizacija ovakvih programa.

Načelnici Nermin Muzur i Srđan Mandić potpisali sporazum

OPĆINA CENTAR SA 30.000 KM POMOGLA ILIDŽI U SANACIJI ŠTETA OD POPLAVA

Načelnici općina Ilidža i Centar, Nermin Muzur i Srđan Mandić, potpisali su ugovor o dodjeli finansijskih sredstava Općini Ilidža za sanaciju šteta izazvanih poplavama. Prema potpisanom ugovoru Općina Centar će Općini Ilidža uplatiti 30.000 KM. Načelnik Muzur zahvalio se kolegi Mandiću na podršci.

- Zahvaljujemo se Općini Centar na pruženoj pomoći. Nastavit ćemo saradnju i na drugim projektima kako bi unaprijedili kvalitet života u našim lokalnim zajednicama - kazao je načelnik Općine Ilidža Nermin Muzur.

Općina Centar osigurala je 100.000 KM, nakon što je OV Centar usvojilo inicijativu o novčanim sredstvima za pomoć Općini Ilidža.

- Općinsko vijeće Centar usvojilo je inicijativu da se u narednom periodu osigura 100.000 KM za pomoć Općini Ilidža. Od ovog iznosa, sa sredstava civilne zaštite 30.000 KM je odmah operativno, a ostatak će Općini Ilidža biti doznačen u 2022. godini - kazao je načelnik Općine Centar, Srđan Mandić.

Za realizaciju ovih projekata izdvojeno je 21.000 KM



Općina Ilidža u proteklom periodu realizirala je pilot projekt kojim se zatvara Rustempašina ulica za saobraćaj vikendom, što je početak realizacije projekta kompletnog zatvaranja ove ulice.

Prošlog ljeta u Rustempašinoj su realizirane su brojne aktivnosti za posjetioce i građane općine Ilidža. Tako je u organizaciji Košarkaškog kluba Ilidža i Općine Ilidža u julu mjesecu realiziran Festival košarke za sve osnovne škole, kao i škole košarke sa područja općine.

U augustu je održana manifestacija Brainobrain dan, koji je organizovan kao vid promocije međunarodnog programa Brainobrain koji već pet godina postoji u Bosni i Hercegovini, a djeluje u još 42 zemlje svijeta.

U organizaciji Udruženja muzikologa i kompozitora BiH i Općine Ilidža, svakog petka i subote u augustu i septembru, održavao se Street music na kojem su različiti izvođači mini koncertima uljepšali ambijent Ilidže i zabavljali prolaznike i posjetioce sa poznatim muzičkim numerama, a u Rustempašinoj su "gostovale" i poznate mažoretkinje iz Kiseljaka.



Načelnici Muzur i Mandić

Općina Ilidža potpisala ugovore s stipendistima

MUZUR: MLADI MORAJU BITI NAŠ PRIORITET



U skladu s Odlukom o dodjeli stipendija talentovanim učenicima i studentima u školskoj/akademskoj 2021/2022. godini u Multifunkcionalnoj sali Općine Ilidža potpisani su ugovori o stipendiranju za školsku 2021/2022. godinu.

Načelnik Općine Ilidža Nermin Muzur, uz upućene čestitke dobitnicima stipendija, kazao je kako mladi moraju uvijek biti jedan od prioriteta svih lokalnih zajednica.

Prisutnim učenicima i roditeljima zaželio je što bolji uspjeh u novoj školskoj godini u nadi da će ispuniti uslove kako bi i naredne godine aplicirali za stipendije koje dodjeljuje Općina Ilidža.

Nakon sprovedenog konkursa za stipendiranje talentovanih u srednjem i visokoškolskom obrazovanju u školskoj/akademskoj 2021/2022. godini Općina Ilidža dodijelila je ukupno 446 stipendija, od čega 178 za učenike i 268 za studente.

Načelnik Nermin Muzur predstavio kapitalne projekte


VIZIJA RAZVOJA OPĆINE ILIDŽA 2022. - 2024.



Muzur je posebno ponosan na projekte uz rijeku Željeznicu

Načelnik Općine Ilidža predstavio je najvažnije projekte čija će planirana realizacija potpuno preobraziti Ilidžu, te je najavio kako će 2022. godina biti historijska za stanovnike naše općine

Prema planiranim projektima 2022. godina trebala bi biti historijska godina za općinu Ilidžu. Između 12 i 15 kapitalnih projekata trebali bi u potpunosti preobraziti izgled Ilidže. Neki od njih na realizaciju čekaju već nekoliko decenija, a oni najznačajniji za općinu Ilidžu i njene stanovnike svakako su tramvajska pruga prema Hrasnici, osnovna škola na Stupu kao i sportska dvorana u Hrasnici.



Osnovna škola na Stupu

Stanovnici Ilidže već desetljećima čekaju na početak realizacije projekta kojim bi se Hrasnica i Ilidža spojile tramvajskom prugom. Izgradnja skoro 13 kilometara tramvajske pruge, sa 20 tramvajskih stanica i okretnicom na kružnom toku na Ilidži koštati će oko 20 miliona eura, što ovaj projekt čini historijskim za našu općinu.

- Vjerujem da će 2022. godina biti historijska godina za općinu Ilidžu. Priče koje su drugi pričali decenijama mi ćemo početi sprovoditi u djelo, a jedna od tih priča svakako je tramvajska pruga za Hrasnicu, baš kao i osnovna škola na Stupu - rekao je načelnik Općine Ilidža Nermin Muzur, te dodao:

- Mislim da s pravom možemo reći da će to biti vjerovatno najmodernija škola u Kantonu Sarajevo, na čijem projektu je radio Arhitektonski fakultet Univerziteta u Sarajevu. Škola koja će biti uređena i opremljena na najmoderniji način imat će i sportsku dvoranu, koja će u danima vikenda moći funkcionisati odvojeno od škole, sa kapacitetom od nekih 200 do 300 sjedećih mjesta.

S početkom građevinske sezone trebala bi početi i potpuna rekonstrukcija sportske dvorane u Hrasnici.

- Dotrajalu dvoranu u Hrasnici zamijenit će novo, moderno, sportsko zdanje, kapaciteta 1.000 sjedećih mjesta. U njoj će se moći igrati međunarodne odbojkaške utakmice, ali i košarkaški i rukometni mečevi domaćih prvenstava - naglasio je Muzur.

Kroz izgradnju potpuno nove sportske dvorane, koja će posjedovati i druge popratne sadržaje, Ilidža će dobiti još jedan važan sportski objekt, a istovremeno će se rasteretiti Kulturno-sportski centar "Sabit Hadžić".



Izgradnjom nove sportske dvorane Ilidža dobija još jedan važan objekt

Ilidža je općina s velikim turističkim potencijalom, a cilj je u budućnosti poboljšati i obogatiti turističku ponudu.

- Projekti na koje sam posebno ponosan svakako su projekti uz rijeku Željeznicu, gdje je planirano uređenje izvora termalne vode. Po realizaciji tog projekta trebali bi dobiti četiri bazena, koji bi izgledali kao vanjski jacuzzi. Na desnoj obali Željeznice planiran je jedan sportsko-rekreativni centar za djecu, mlade ali i odrasle. On bi trebao imati tri igrališta za djecu, terene za odbojku na pijesku, košarku i mali fudbal, kao i teretanu na otvorenom - rekao je Muzur, te apostrofirao i to da su nedavne poplave bile pokazatelj da budući objekti neće biti ugroženi ni u vrijeme povišenog vodostaja rijeke Željeznice.



Termalni bazeni iz ptičje perspektive

Velikom parku, koji se nalazi na površini od 47.000 metara kvadratnih, trebao bi se, prema nacrtima iz vremena Austro-Ugarske, vratiti stari izgled, što bi mu, prema riječima načelnika Muzura, trebalo donijeti epitet najljepšeg parka u Kantonu Sarajevo, a možda i u Bosni i Hercegovini.



Sportsko-rekreativni centar za djecu i mlade na obali Željeznice

Centralni dio Ilidže bi u narednom periodu trebao dobiti jedan od najljepših i najvećih trgova u Kantonu Sarajevo, a nosit će ime legendarnog košarkaškog stručnjaka Sabita Hadžića.



Velikom parku bit će vraćen izgled iz vremena Austro-Ugarske


- Mi smo već pokrenuli određene radnje, uklonili smo neke objekte, a naša je zamisao da svi objekti koji se nalaze u ovoj zoni u budućnosti imaju identičan izgled fasade - objasnio je Muzur, ali i naglasio kako se važnost ovog projekta ogleda i u uređenju površina između dvije škole u samom centru Ilidže.

Bitan projekt za Ilidžu svakako će biti i izgradnja kružnog toka na raskrsnici ulica M-17 - Lužansko polje - IV Viteška brigada, kao i uključne trake na zapadni prilaz gradu u naselju Osjek, što su projekti koji će sigurno smanjiti saobraćajnu gužvu u centru Ilidže.



Trg "Sabit Hadžić" u centru Ilidže

Ratni put preko Igmana ima veliki značaj, kako historijski, tako i patriotski za teritoriju općine Ilidža.



Dio trase ratnog puta preko Igmana

- Svima je dobro poznata važnost i uloga ratnog puta preko Igmana tokom agresije na Bosnu i Hercegovinu. Plan je da se u narednoj fazi asfaltira oko četiri kilometra tog puta, od sadašnjeg Rezervoara do izlaska na "osmice", a u budućnosti da se spoji na putnu komunikaciju ka Bjelašnici - rekao je načelnik Općine Ilidža.



Krajem 2021. počelo je aviosnimanje na području Vlakova

Kao projekt od posebnog značaja za stanovnike Ilidže, načelnik Nermin Muzur, izdvojio je početak obnove premjera, koji je počeo aviosnimanjem katastarske općine Vlakovo.

- Prva aviosnimanja na području Vlakova obavljena su krajem 2021. godine. U narednom periodu prikupit će se informacije od građana, kao i određena dokumentacija, kako bi se u budućnosti stvorile pretpostavke za kvalitetno prostorno planiranje - kazao je Muzur.

Već na samom početku 2022. godine počeli su i radovi na rekonstrukciji ulice koja spaja Veliku aleju i Stojčevac, ali i ulica na samom Stojčevcu.

Na Trećoj vanrednoj sjednici Općinskog vijeća Ilidža

ILIDŽANCIMA 586.000 KM ZA PRIJAVLJENE ŠTETE U NOVEMBARSKIM POPLAVAMA



Izdvojena sredstva tek su jedan bio od procijenjene štete koja premašuje iznos od dva miliona KM

Kroz sporazum sa Ministarstvom privrede KS osigurali smo još jednu važnu stvar, a riječ je o iznosu od 800.000 KM za eksproprijaciju zemljišta u Otesu na dijelovima gdje je tokom posljednjih poplava bilo najviše problema, rekao je načelnik Općine Ilidža Nermin Muzur

Na Trećoj vanrednoj sjednici Općinskog vijeća Ilidža, koja je održana 29. decembra 2021. godine, usvojen je Prijedlog izvještaja o procijenjenim štetama prouzrokovanim poplavama u novembru prošle godine na području općine Ilidža.

Zaključci koji definišu ovu odluku usvojeni su jednoglasno, a građanima općine Ilidža, koji su uredno prijavili štete nastale u poplavama, bit će isplaćeno ukupno 586.290,50 KM, što je tek jedan bio od procijenjene štete koja premašuje iznos od dva miliona KM.

Sanacija korita

Načelnik Općine Ilidža Nermin Muzur kazao je kako su osigurana i dodatna sredstva kada je riječ o sanaciji korita vodotoka na Ilidži, posebno rijeke Željeznice.

- Kroz sporazum sa Ministarstvom privrede Kantona Sarajevo osigurali smo još jednu važnu stvar, a riječ je o iznosu od 800.000 KM za eksproprijaciju zemljišta u Otesu na dijelovima gdje je tokom posljednjih poplava bilo najviše problema. U narednom periodu trebalo bi biti uređeno prvih 200-300 metara korita, počevši od mosta na samom ulazu u naselje Otes - rekao je načelnik Općine Ilidža.

Načelnik Muzur naglasio je kako se radi o ogromnoj količini novca koja će olakšati i ubrzati rješavanje ove vrste problema, a zahvalio se i resornom ministru Adnanu Deliću.

- Nadam se da ćemo ovo iskoristiti na pravi način kako bi u budućnosti mogli što efikasnije djelovati kada je riječ o ovoj

problematici - dodao je Muzur na kraju sjednice Općinskog vijeća Ilidža na kojoj su usvojeni svi predloženi zaključci.

Usvojen je Izvještaj Komisije za procjenu šteta o procijenjenoj šteti nastaloj u poplavama u novembru 2021. godine na području općine Ilidža.

Shodno tome Općinski načelnik zadužen je da u skladu sa Zakonom o zaštiti i spašavanju ljudi i materijalnih dobara od prirodnih i drugih nesreća i Uredbom o jedinstvenoj metodologiji za procjenu šteta od prirodnih i drugih nesreća Izvještaj Komisije za procjenu šteta uputi prema višim nivoima vlasti u cilju nadoknade štete iznad finansijskih mogućnosti Općine.

Odobrena je isplata novčanih sredstava za naknadu štete nastale uslijed novembarskih poplava u iznosu od 586.290,50 KM za sva fizička lica koja su pretrpjela štetu na stambenim objektima i namještaju, a koja su podnijela zahtjev za procjenu štete i uvrštena su u Izvještaj Komisije za procjenu šteta o procijenjenoj šteti nastaloj za vrijeme prirodne nesreće.

Usvojeni svi zaključci

Općinsko vijeće Ilidža zadužilo je načelnika Muzura da imenuje Komisiju za raspodjelu sredstava posebne naknade za zaštitu od prirodnih i drugih nesreća fizičkim licima koja su pretrpjela štetu isključivo na stambenim objektima u nedavnim poplavama, a koja će vršiti i raspodjelu sredstava prikupljenih putem Kantonalne, odnosno Federalne uprave civilne zaštite, određenih donatora i drugih organizacija koje su spremne pomoći ugroženom stanovništvu.

Sporazum vrijedan 1,75 miliona KM potpisali načelnik Muzur, ministar Avdić i direktorica Barlov



Muzur, Barlov i Avdić nakon potpisanog sporazuma

GRADI SE MODERNA DVORANA U HRASNICI

Načelnik Muzur zahvalio se Vladi Kantona Sarajevo, premijeru Edinu Forti i ministru kulture i sporta Samiru Avdiću, koji je kroz prethodni period pokazao veliki interes za saradnju s Općinom Ilidža

Načelnik Općine Ilidža Nermin Muzur, ministar kulture i sporta Kantona Sarajevo Samir Avdić i direktorica Zavoda za izgradnju KS Belma Barlov potpisali su Sporazum o sufinansiranju projekta Općine Ilidža "Izgradnja sportske dvorane u Hrasnici".

Kroz ovaj Sporazum Ministarstvo kulture i sporta KS finansijski će podržati izgradnju nove sportske dvorane u Hrasnici, koja je jedan od kapitalnih projekata Općine Ilidža za naredni period.

- Kroz izgradnju potpuno nove dvorane dobit ćemo još jedan važan sportski objekt na našoj općini i tako rasteretiti Kulturno-sportski centar "Sabit Hadžić" na Ilidži - rekao je načelnik Općine Ilidža, naglasivši da su sredstva iz potpisanog Sporazuma namijenjena za 2021. godinu.

Općinski načelnik Muzur zahvalio se na Vladi Kantona Sarajevo na razumijevanju i podršci, kao i premijeru Edinu Forti i ministru

kulture i sporta Samiru Avdiću, koji je kroz prethodni period pokazao veliki interes za saradnju s Općinom Ilidža kada je riječ o projektima iz nadležnosti ministarstva koje predvodi.

- Izuzetno mi je drago da će Hrasnica kroz ovaj projekt dobiti jednu novu i modernu sportsku dvoranu. Moram biti iskren pa reći da sam zbog rahmetli Sabita Hadžića, istaknutog bh. olimpijca i legendarnog košarkaša, posebno vezan za Hrasnicu. Nadam se da će u novoj dvorani, za koju smo u 2021. godini izdvojili 1,75 miliona KM, stasati neke nove košarkaške vedete i sportske veličine poput našeg Sabeta - kazao je Samir Avdić.

Modernim izgledom sportska dvorana u Hrasnici će definitivno unaprijediti sportski kompleks oko stadiona Famosa, koji je posljednjih godina bio prilično zapušten i u lošem stanju. Prvi korak ka poboljšanju njegovog izgleda načinjen je izgradnjom terena sa umjetnom travom.

Regionalno košarkaško takmičenje

TURNIR ABA 2 LIGE PONOVO NA ILIDŽI



Treći ovosezonski turnir regionalne košarkaške ABA 2 lige odigran je na Ilidži od 13. do 19. decembra 2021, a organizator utakmica petog, šestog i sedmog kola bio je OKK Spars Ilidža.

- Prošle sezone smo Sparsu pomogli organizaciono, a u budućnosti smo spremni pomoći u mnogo većem obimu. Žao nam je što se prošle sezone nisu uspjeli plasirati u najjači rang takmičenja. Za razvoj sporta na našoj općini itekako bi značilo da ljubitelji košarke na Ilidži mogu gledati utakmice Crvene zvezde, Partizana, Budućnosti, Cibone i drugih renomiranih klubova iz regiona - rekao je načelnik Nermin Muzur, te naglasio kako Ilidža želi organizaciju završnog turnira.

Domaći sastav Sparsa upisao je dvije pobjede i jedan poraz.

Ministri i članovi Skupštine Kantona Sarajevo boravili u posjeti Općini Ilidža

KAPITALNI PROJEKTI ZA 2022. GODINU DOBILI POHVALU KANTONALNE VLADE



Delegaciju Vlade Kantona Sarajevo činili su resorne ministricе i ministri Naida Hota-Muminović, Ivana Prvulović, Samir Avdić, Admir Katica, Adnan Delić i Omer Osmanović, predsjedavajući Skupštine KS Elvedin Okerić, njegova zamjenica Danijela Kristić, kao i zastupnice i zastupnici Skupštine KS

Načelnik Općine Ilidža Nermin Muzur održao je sastanak s predstavnicima Vlade Kantona Sarajevo koju su činili resorne ministricе i ministri (Naida Hota-Muminović, Ivana Prvulović, Samir Avdić, Admir Katica, Adnan Delić, Omer Osmanović), predsjedavajući Skupštine KS Elvedin Okerić, njegova zamjenica Danijela Kristić, kao i zastupnice i zastupnici Skupštine KS.

Na sastanku su pored općinskog načelnika, prisustvovali i predsjedavajući Općinskog vijeća Ilidža Tarik Stambolić i njegov zamjenik Redžo Lemezan, prvi čovjek Općine Ilidža predstavio je kapitalne projekte koji su planirani za 2022. godinu.

Uz vizualnu prezentaciju, načelnik Općine Ilidža predstavio je sve važnije projekte, a za koje je zatražio i finansijsku podršku Vlade Kantona Sarajevo, odnosno nadležnih ministarstava.

Prvi od prioriteta Općine Ilidža u 2022. godini bit će izgradnja nove sportske dvorane u Hrasnici, a uz taj projekt trebala bi se realizirati i rekonstrukcija fudbalskog stadiona, čiji bi pomoćni teren u narednom periodu trebao dobiti reflektore.

Projekt na koji je stavljen poseban akcent je izgradnja osnovne škole na Stupu. Sudionici sastanka bili su pozitivno iznenađeni samim projektom i modernim izgledom buduće škole, koji je posebno pohvalila ministrica predškolskog, osnovnog i srednjeg obrazovanja u Kantonu Sarajevo, Naida Hota-Muminović.

I ostali učesnici sastanka pohvalili su ideje i zamisli koje Općina Ilidža želi u narednom periodu kroz projekte sprovesti u djelo, te su naglasili da ideje nisu nerealne i da podrška Vlade Kantona u njihovoj realizaciji sigurno neće izostati.

Na Dan državnosti Bosne i Hercegovine članovi Odreda izviđača Igman 92 realizovali važan projekt

NA IGMANU POSTAVLJENE INFO TABLE



Popravljen planinarska staza Hrasnica - Hrasnički stan

Na Dan državnosti Bosne i Hercegovine članovi Odreda izviđača Igman 92 priveli smo kraju i posljednju fazu projekta "Izviđači Igmanu".

Popravili su zapuštenu i uništenu planinarsku markaciju na stazi Hrasnica - Hrasnički Stan i postavili putokaze na najvažnijim raskrsnicama. Osim toga, postavljeni su i znakovi zabrane korištenja motornih vozila na planinarskoj stazi. Također, postavili su i dvije info table, sa osnovnim podacima o planini Igman, flori i fauni, te topografskom kartom sa ucrtanim stazama.

- Uređenje i očuvanje naše okoline samo je dio misije izviđaštva. Ovo je samo jedna u nizu sličnih aktivnosti odreda, na koje smo zaista ponosni, jer brigom i čuvanjem naše prirode se iskazuje ljubav prema domovini - poručili su iz Odreda izviđača Igman 92.

Sastanak sa direktorima JU Domova zdravlja i JU Kantonalnog centra za socijalni rad

Najavljena realizacija projekta energetske efikasnosti i utopljanja Doma zdravlja na Ilidži

NAČELNIK MUZUR: CILJ JE UNAPRIJEDITI OBLAST ZDRAVSTVA I SOCIJALNE BRIGE

Općinski načelnik Nermin Muzur delegirao je potrebu građana za izgradnjom ambulate na Stupskom brdu, što je direktor Baltić podržao. Sljedeći korak je izrada projektne dokumentacije i pokretanje procedure za realizaciju ovih objekata.

Općinski načelnik Nermin Muzur i rukovodstvo Općinskog vijeća Ilidža, predsjedavajući Tarik Stambolić i dopredsjedavajući Samir Avdić i Redžo Lemezan, održali su sastanak sa direktorom JU Domova zdravlja KS, Abelom Baltićem, direktorom JU Kantonalnog centra za socijalni rad Mahirom Delićem i njegovim saradnicima te predstavnicima Centra za socijalni rad Ilidža. Sastanku je prisustvovao i vijećnik Selver Zečirević.

Razgovaralo se o aktuelnim temama iz oblasti zdravstva i socijalne brige te mogućnostima saradnje i pružanja podrške radu ovih ustanova.

Općinski načelnik Muzur najavio je realizaciju projekta energetske efikasnosti i utopljanja Doma zdravlja na Ilidži što za rezultat ima unapređenje uslova za što bolje pružanje usluga građanima. Takođe, Općina Ilidža će u narednom periodu izvršiti nabavku sanitetskog vozila koje će se dati na raspolaganju Domu zdravlja na Ilidži, te će u narednoj godini planirati sufinansiranje specijalizacija ljekara iz oblasti porodične medicine.

Direktor Baltić istakao je da je najveći izazov JU Domova zdravlja KS nedostatak kadra, što za rezultat ima velike gužve i nedostatak porodičnih ljekara u lokalnim ambulantama.

Međutim, istakao je da će u narednom periodu interventno osigurati četiri ljekara porodične medicine za Dom zdravlja Ilidža, a u narednoj fazi će se angažovati još tri ljekara za lokalne ambulante.

Takođe, uputio je zahtjev da Općina Ilidža pruži podršku u promociji dječje vakcinacije, jer samo oko 18% ilidžanske djece

je vakcinisano protiv dječjih bolesti.

Općinski načelnik Nermin Muzur delegirao je potrebu građana za izgradnjom ambulate na Stupskom brdu, što je direktor Baltić podržao. Sljedeći korak je izrada projektne dokumentacije i pokretanje procedure za realizaciju ovog projekta.

Što se tiče oblasti socijalne brige, direktor JU Kantonalni centar za socijalni rad, Mahir Delić, zahvalio se načelniku Muzuru na pozivu za održavanje sastanka i istakao izvrsnu saradnju sa Centrom za socijalni rad Ilidža.



- Želimo da unaprijedimo komunikaciju sa Centrom kada je riječ o razmjeni informacija o građanima u stanju socijalne potrebe. Takođe, provodimo i niz aktivnosti za stvaranje humanijih uslova za život romskih porodica sa područja općine te ćemo u narednom periodu razmotriti mogućnosti i programe za posredovanje u zapošljavanju i stambenom zbrinjavanju osoba koje izlaze iz programa društvene brige kao i pripadnika nacionalnih manjina - istakao je načelnik Muzur.



**Osnovna škola
Stup**



**Tramvajska pruga
Ilidža - Hrasnica**




**Sportska dvorana
Hrasnica**



**Veliki
park**




**Termalni
bazeni**



**Sportsko-rekreacioni
centar za djecu i mlade**



**Trg
"Sabit Hadžić"**



**Kružni tok
"Idu dani"**



**Uređenje centralnog
dijela Ilidže**



**Ratni put
preko Igmana**



**Rekonstrukcija
Stojčevca**



**Obnova
premjera**